

西夏書事

乙亥春仲

銅山張伯英





西夏書事卷五

青浦 吳廣成西齋 纂

淳化二年

契丹統和九年

春正月商州團練使翟守素將兵

援趙保忠于夏州

太宗命守素率大兵援保忠賜保忠茶百觔上醢

十石

附

遼史聖宗紀統和九年二月夏國王李繼遷

遣使獻捷攷是時繼遷無與宋交兵事意即告

下麟鄜等州之偽詞耳故不書

夏四月謝契丹封冊

繼遷遣杜白

遼史西夏傳作李知白今從聖宗紀

至契丹謝并請合

兵入寇

秋七月由趙保忠請降授銀州觀察使

繼遷走漠北幾十年阻兵嗜殺蕃部被役屬者胥

怨夏州之戰雖敗保忠兵部下指揮朗吉等潛相

攜貳時聞翟守素至夏州恐兵力不敵詐遣人由

保忠奉表謝罪朝廷信之遂授以官

按

此繼遷受宋命之始書以為後日書反張本

賜姓名趙保吉

弟繼冲賜姓名趙保寧授綏州團練使母罔氏向
爲曹光實所獲封西河郡太夫人留養京師命知
制誥王禹偁草制賜之保吉餽良馬五十匹爲潤
筆禹偁不受

按此西夏受宋姓之始

八月趙保吉上所授勅命于契丹

保吉先以復綏銀二州告至是復上勅命

按宋史夏國傳終繼遷身不書賜姓名茲書趙

西夏書事 卷五 二
保吉惡之也寵以天潢之屬不能易其倔強之
心是宋欲愚繼遷而適爲繼遷所愚矣

九月趙保忠言破保吉于王庭鎮保吉走鐵斤澤

王庭鎮爲夏州外蔽地連沙磧向有寨柵可守保
吉于雍熙中焚毀之是時將兵據其舊址以窺夏
州保忠上言帥衆乘夜擊敗之熟戶貌奴猥才二
族以兵邀截奪牛畜二萬餘保吉復棄銀州奔入

鐵斤澤

冬十月出攻熟倉族

熟倉大族東西蕃部五千餘帳皆保聚巖谷爲環
慶籓籬保吉不得熟倉不能入環慶遣使誘之曰
身已歸朝賜國姓今後請勿相拒共稟朝命諸酋
勿應保吉由鐵斤澤引兵攻之咩噠復率來離諸
族拒戰保吉始退

趙保忠復言破宥州禦泥布羅樹二族
保忠奏二族旣降陰使人朋附保吉已率兵襲破
之併其衆

十一月趙保忠叛以夏州降契丹封西平王復姓名

李繼捧

初保忠歸朝非其本意及受命圖保吉陰與之通
保吉復使人以契丹命誘之許以重復王爵永鎮
夏州保忠心動遣使表附契丹契丹主授推忠効
順啟聖定難功臣開府儀同三司檢校太師兼侍
中封西平王復本姓名呂忠曰保忠之再入夏
臺故地趙普之謀也而保忠反與保吉合爲邊患
附契丹普能知符彥卿之不可與以兵權何不能
知保忠之不可復歸其州耶

按春秋例凡叛賤者不書故成十七年齊高無咎之子以盧叛襄二十九年齊高比之子以盧叛不書必卿佐而後書襄二十六年衛孫林父入于戚定十一年宋公弟辰入于蕭十三年晉趙鞅入于晉陽荀寅士吉射入于朝歌此四者則書叛夏州雖保忠舊業然納爲王土身爲王臣一旦據以外附非叛而何宋史遺其事不書茲特補之以正其罪

淳化三年

契丹統和十年

春正月保吉復入銀州契丹兵至

大掠

保吉既誘保忠臣契丹復引兵入銀州據之遣使

由保忠請命入貢契丹主聞其懷二心遣西南招

討使韓德威率兵持詔詰之德威至銀州

遼史聖宗紀及

德威本傳俱云持詔至靈州攷是時靈州尚屬中國保吉所據乃銀州耳遼史誤

保吉託

以西征不出見德威怒縱兵大掠而還

夏四月請通陝西互市

保吉自婚契丹歲時貢獻悉取資于蕃族財用漸

乏時陝西尚嚴邊禁積外商旅不通保吉上言王

者無外戎夷莫非赤子乞通互市以濟資用太宗
詔從之

冬十月復貢于契丹

保吉以德威侵掠告契丹契丹主賜詔拊諭之于
是復遣使貢

十一月趙保忠貢白鶻

保忠既臣契丹與保吉謀益密朝廷未悉其奸謂
銀夏安靜優其俸給歲終賜予並加等保忠遣使
獻白鶻號海東青太宗詔以久罷田獵還賜之

吳炯

五總志云登州海崖中有鵲能自高麗一飛渡海名海東青唐人呼為決雲兒本朝趙保忠曾得之

淳化四年

契丹統和十一年

夏四月保吉反寇慶州

保吉雖復綏銀猶以未得宥夏等州遣使入請太

宗不許保吉怒曰五州故地先業畱遺拓土展疆

是誠在我乃合于衆曰身雖薄德承累世之澤撫

諸族之豪安能迷運守常沒身沙漠諸君其努力

圖之遂以李大信為蕃部都指揮使率衆犯慶州

州北直接沙漠地形漫衍無險可恃時以保吉納

款戰守無備兵至人情駭懼知州劉文質以私錢

二百萬給賞于是士皆奮鬪大信不能勝

秋八月入原州

陝西歲比不登加以餽餉勞擾民不堪命保吉偵知虛實率兵入原州圍牛欄砦與團練使石保普相持數日乃還

冬十月圍環州除鹽禁

西羌部落種藝殊少惟用池鹽與邊民交易穀麥保吉自銀州入擾朝廷震怒陝西轉運副使鄭文寶建議以爲銀夏之北千里不毛但以販青白鹽

西夏書事 卷五 六
爲命請禁之以困戎人保吉可不戰屈也數月西
人大困沿邊熟戶無以資生皆叛歸保吉保吉合
四十二族首領盟于楊家堡引兵萬三千人寇環
州石昌鎮屠小康堡知環州程德元擊之不退太
宗詔知制誥錢若水馳驛詣邊弛其禁撫慰諸羌
乃已

按

青白鹽爲西人生計之原自保吉兵起一再
禁止歷德明元昊遂失其利夏國緣是終臣文
寶之策未爲過也但太宗旣從其議宜令邊臣

豫爲之備保吉雖強豈能肆逞乃戎人擾動遽
而改圖是朝廷之禁令憑敵勢爲轉移豈謀國
之計哉

淳化五年

契丹統和十二年

春正月保吉徙綏州民于平夏

牙將高文岷反攻之遂棄綏州

保吉兵至綏州令保寧徙民歸平夏牙將高文岷
唐刺史思祥後也世官綏州因衆不樂率羌酋蘇
移山海夜毋馱香等反攻之保吉兵敗棄城走文
岷舉綏州降太宗詔授綏州團練使蘇移山海等

為懷化將軍

宋史孫全照傳淳化五年率兵與李繼隆克綏州因與張崇貴等同戍守

之與宋史

夏國傳異

按

徙民大舉也平素恩義未孚鮮有不敗事者

況保吉以兵威脇之不特眾叛且親離矣綏州

之禍乃其自取于文岷何誅

三月趙保忠出次于野保吉襲敗之併其眾

初保吉攻圍諸砦侵掠居民肆焚積聚靈州及清

遠軍以聞

王氏東都事畧保忠為保吉所誘陰與之合來寇靈州宋史夏國傳淳化五年

正月保吉圍堡砦掠居民焚積聚遂攻靈州李繼

隆諸傳亦以攻靈州為文攻太宗紀淳化五年正

月癸酉以侍衛馬軍都指揮李繼隆爲河西行營都部署討李繼遷不言繼遷攻靈州至至道二年五月方書繼遷攻靈州則是時尙未犯靈州也故李氏長編云繼遷焚掠堡砦靈州及清遠軍以聞太宗命馬軍都指揮李繼隆爲河西都部署尙食使尹繼倫爲都監討之保忠聞繼隆兵至挈其家人吏卒壁于野外遣牙將李光祚告保吉保吉欲併其衆縛光祚帳中以輕騎乘夜襲保忠營保忠方寢聞難作散衣披髮單騎走還資財器用悉爲保吉所奪會繼隆前部金明鎮使李繼周兵至保吉令蕃部數千邀之石堡砦不克而退

按保忠節度五州當大軍將至儲糗糧具卒乘以效前驅分也顧乃挈其母妻壁于野外何耶想其內不自安擇營利便緩則出迎王師急則走依保吉甚則叛投契丹狡兔三窟情或有然卽其被襲走回焉知非賺入夏州以爲內應計耶奸雄之智真愈久愈幻矣

夏州將趙光嗣執趙保忠幽之保吉復棄銀州走漠

中

保忠嘗遣其牙內指揮李光嗣入貢光嗣潛輸誠

欵太宗賜國姓授供奉官尋遷禮賓副使使還鎮
凡保忠動靜必以聞既而保忠陰通保吉光嗣盡
出家財散士卒誓効順及李繼隆奉命討保吉保
忠猶獻馬五十匹上言已與保吉解怨乞罷兵太
宗怒甚詰保忠云不斬繼遷開狡免之三窟潛疑
光嗣持首鼠之兩端立遣中使督繼隆移軍擊保
忠師壓境保忠已爲保吉敗回光嗣執之幽于別
室開門迎繼隆裨將侯延廣監軍秦翰議誅保忠
繼隆曰保忠机上肉耳當請之天子乃執送汴

曾氏

隆平集保忠歸夏州又潛與保吉為表裡遂往依
 之保吉不納復還夏州牙校已據其城保忠不得
 入王師俘保忠以歸故保吉因保吉聞保忠被執
 併夏州之地與宋史夏國傳異

遂棄銀州走漠中

宋史秦翰傳王師次延州翰慮保忠遁逸即馳驛先往矯詔安撫

撫以緩其陰謀及王師至翰又諷保忠以地主之禮郊迎因並驅而出遂就擒沈括筆談繼隆奉詔

由克胡渡河抵綏州諸將請駐兵石堡砦以觀隙繼隆曰今惟乘銳疾馳出其不意擒之若停石

堡夏州備禦完固不得入矣即將兵日夜馳三百里至夏州保忠猶未之知倉猝出迎遂執之攷李

氏長編云保忠先已出次野外既為保吉所襲及還光嗣遂執之安得再出迎王師也

按

觀于此而知夏州之亂保忠成之即保忠甚

之也當其入朝伊始憾諸父之相懟願獻五州

以圖榮寵及夏臺再鎮則與保吉通連任其反
覆藉以煽動戎人畱資富貴蓋兩人謀雖同而
心自異也迨事機敗露身爲光嗣所幽保吉聞
之亦去豈非內援旣除外望自絕耶然而七載
無功五州終失名居叛逆身作俘囚噫若保忠
者真李氏之豚犬有宋之蝥賊矣

夏四月削所賜姓名銀夏帳族皆內附

太宗下詔削保吉姓名復爲李繼遷又以夏州深
在沙漠常爲奸雄竊據欲墮其城宰相呂蒙正曰

自赫連築城以來世爲關右之患若遂廢之萬世利也因盡遷其民于綏宥等州以官地給之于是銀夏州管勾生戶八千帳族俱棄繼遷內投

五月趙保忠至闕賜爵宥罪侯

保忠至闕下白衫紗帽待罪崇政殿廷太宗詰責數四保忠不能對但頓首稱死罪詔釋之賜冠帶器幣並賜其母金銀等器尋補右千牛衛上將軍封宥罪侯使之就第宋制諸衛上將軍及大將軍等銜並環衛官無定品惟宗室爲之保忠雖責降

太宗猶以賜姓待之也

按

書賜爵譏宋失刑且失賞也昔東漢彭寵據
漁陽叛蒼頭子密殺寵以降光武封爲不義侯

北魏宦官符承祖坐贓應死孝文原之封佞濁
子斯二者史臣猶議其非況保忠身爲叛逆罪
又甚焉而宥之侯之是叛逆可宥何罪不可宥
叛逆可侯何人不可侯哉柰刑賞而壞名器太

非宗此舉所失多矣

繼遷母罔氏羈于延州

罔氏即曹光實所獲者叅政寇準請斬于保安軍
 北門外以儆凶逆宰相呂端曰昔項羽欲烹太公
 漢祖曰遺我一杯羹夫舉大事者固不顧親況繼
 遷悖暴之人哉且今日殺之明日繼遷可捨乎不
 然徒樹怨仇而益堅其叛心宜置于延州使善視
 之以招繼遷雖不能即降終可以係其心而母之

生死在我矣太宗從其策

司馬光涑水記聞及呂誨補其祖正惠公端傳

以為此事在端為相準為樞密副使時據長編攷
 異云與二人進官年月不合蓋準于淳化二年為
 樞副九月改同知四年六月準罷端始叅政五年
 九月準亦叅政至道元年四月端拜相仍叅政二

八年七月準罷叅政端相如故咸平元年十月端罷相端在中書凡六年其初爲叅政時準卽罷樞密矣補傳記聞皆誤又云淳化五年四月詔削奪繼遷所賜姓名或因是準欲斬其母而端救之耳今宗其後罔氏病死延州

六月繼遷屯橐駝路熟藏族首領乧遇擊之走還平

夏

繼遷旣遁李繼隆遣弟洛苑使繼和入奏請于銀

夏南界山中增置堡戍斷敵糧運且爲諸部熟蕃之蔽繼遷聞之先率兵扼橐駝路脇兩州內屬戎人及橐駝等物歸平夏党項熟藏族首領乧遇率

所部反攻繼遷敗之其弟力戰而死遇內歸太宗

詔授會州刺史

秋七月遣牙校貢馬

繼遷數寇夏州嘗與神衛指揮使許均一日十二

戰不能克乃遣左都押衙張浦指揮李光祚詣綏

州見內殿右班張崇貴僞求納款會于石堡砦崇

貴椎牛釃酒犒諭之給以錦袍銀帶浦等同繼遷

遂遣牙校以良馬入貢且謝過

八月遣弟延信入朝

繼遷知中國恩禮未衰遣從弟延信貢橐駝名馬
入朝謝罪且言違叛事出保忠願赦勿誅太宗召
見延信面加撫慰厚賚遣還

附

遼史蕭撻凜傳統和十二年夏人梗邊皇太

妃受命總烏古及永興宮分軍討之撻凜爲阻
都詳穩凡軍中號令太妃悉委之師還以功
封蘭陵郡王攷西夏傳是年書夏國入貢而聖
宗紀不載梗邊事

至道元年

契丹統和十三年

春正月繼遷遣左都押牙張浦

入貢被畱不遣

繼遷叠次進獻太宗遣張崇貴賜以器幣茶藥衣服持詔諭之云既除手足之親已失輔車之勢繼遷見之惶懼復遣張浦李光祚以良馬橐駝入貢

太宗令衛士翹關超乘引强奪槊于後園

李氏長編作衛

士數百輩射于崇政殿
廷與宋史夏國傳異

俾浦等觀之初李延信還

賜勁弓三皆力及一石六斗繼遷意上欲威示戎裔非有人能挽也至是浦見士皆拓兩石弓有餘力大駭太宗笑曰羌人敢敵否浦曰羌部弓弱矢

短但見此長大人已遁矣況敢敵乎太宗謂曰戎人貧婁飲食衣被粗惡無可戀者繼遷何不束身自歸永保富貴浦頓首謝太宗以浦爲繼遷謀主授銀青光祿大夫檢校工部尙書鄭州刺史兼御史大夫充本州團練使畱之京師

三月獻馬契丹

繼遷聞宋畱張浦遣使獻馬契丹以自結

夏四月請禁邊軍盜掠

太宗詔令謹守疆場以所盜物還之

六月表乞夏州授鄜州節度使不受

繼遷遣使奉表言懷攜柔遠王者之洪規裕後光
前子臣之私願臣先世自唐初向化永任邊陲迨
僖廟勤王再忝國姓歷五代而恩榮勿替入本朝
而封爵有加德並戴天情深拱極茲以家廷多難
骨肉相仇遂致帳屬流離箕裘隕越庭堅之宗忽
焉不祀若敖之鬼嗟其餒而臣雖拓跋小宗身是
蓋臣後裔十世之宥義在褒忠三代之仁典昭繼
絕聿維夏州荒土羗戶零星在大宋爲偏隅于渺

躬爲世守祖先靈爽應戀首邱明發私懷敢忘宗
土恭惟皇帝陛下垂天心之慈愛捨茲彈丸矜蓬
梗之飄零俾以主器誠知小人無厭難免僭越之
求伏祈聖主寬仁遠降哀全之詔曲成靡旣再造
莫酬臣不勝惶悚恐懼云云太宗覽奏知其詐遣
閣門制使馮訥中使賈繼隆持詔拜繼遷爲鄜州
節度使鄜州去延安止二小程其城周圍二十里
二土山在其中正當狗道嶺靈夏並隔沙磧川原
平坦繼遷以易受中國控制不奉詔

西夏書事 卷五 三
秋七月逐党項睡泥族于蕭關

西界蕃部不下數十萬帳始猶互相捍拒及繼遷
兵勢寢盛自靈州北河外鎮戎軍環州至斂子山
賀蘭山西隴山內外黃河以東諸族無不帖服獨
睡泥族首領哱逋不肯下繼遷以兵掠其七百餘
帳哱逋兵潰奔蕭關副首領你乜逋遣子詣靈州
請救太宗詔以資糧助之
還襲都鈐轄劉用兵于烏白池不克
劉用駐兵烏白池扼鹽夏要路繼遷輕兵襲之用

設伏以待斬首數千級奪馬五百餘匹繼遷大敗
還

八月夏州獻嘉禾

趙保忠被執李繼隆選夏州家戶爲廳子軍送京
師請授趙光嗣爲夏州團練使守其地光嗣獻嘉
禾一函

按西陲俶擾民不聊生何瑞之有此書獻嘉禾
下書寇清遠比事以觀其義得矣

九月訐奏轉運副使鄭文寶寇清遠軍

繼遷數窺靈夏太宗議城古威州拒之遣內侍馮
從順訪于轉運使鄭文寶文寶言威州在清遠軍
西北樂山之西水甘土沃有良木薪秸之利約葫
蘆臨洮二河壓明沙蕭關兩戍東控固原北固峽
口城之誠便然自環州至伯魚伯魚抵青岡青岡
距清遠已皆兩舍而威州更去清遠八十里緣邊
有警繼遷引平夏勝兵三千據清遠之衝乘高守
險數百人守環州甜水谷獨家原傳箭野利十族
脇從山中熟戶党項誰敢不從又分千騎守磧北

要路則自環至靈七百里之地非國家所有豈一
威州可禦哉請先建清遠城爲頓師歸重之地則
朔方可安太宗從其議文寶至清遠畱屯數千人
親督其役繼遷親信酋長鬼囉鬼悉俄文寶誘以
金帛與手書要約畱其長子爲質令陰圖之事成
當授以刺史又豫漆木函以備馳獻繼遷首亟發
民夫曳古碑石詣清遠圖紀功而鬼囉等悉以情
告繼遷上表請罪尋以千餘騎攻清遠文寶與守
將張延拒卻之

熟藏族首領乜遇復擊繼遷繼遷誘之降不聽

乜遇數攻繼遷奪牛馬三千餘繼遷使人誘之降

乜遇曰吾一心向漢誓死不移延州以狀聞太宗

授遇檢校司空賜帛五十匹茶五十觔

復削所賜姓名

繼遷雖叛連次入貢猶稱所賜姓名中國答詔因

仍不去會寇清遠太宗下詔嚴責復削之

冬十月攻兀泥族首領黃羅悉其族帳北走

党項兀泥族首領黃羅嘗以兵敗契丹繼遷誘與

之合不得淳化末偕兀泥中族首領佶移子突厥
羅內屬授懷化將軍領昭州刺史繼遷數舉兵攻
之黃羅不敵悉其族帳北遁數年不敢入貢

十一月遣使獻捷契丹

獻清遠軍及兀泥族捷也

十二月誘契丹兵犯府州

先是契丹招討使韓德威率數萬騎誘党項勒浪
嵬族犯府州觀察使折御卿敗之于子河汭夏州
逼近麟府德威旣敗繼遷爲之氣喪會御卿病繼

遷牒告契丹誘之入邊許以兵助御卿輿疾出禦
德威聞之不進繼遷兵亦不出

西夏書事卷六

青浦 吳廣成西齋 纂

至道二年

契丹統和十四年

春正月繼遷貢于契丹

繼遷事契丹謹歲時進奉及賀正生辰使不絕于道

三月邀官軍于浦洛河奪其糧運

自清遠至靈武中有浦洛耀德二廢城爲河西餉道繼遷西掠諸戎路率由此懼有兵扼其要害輒揚言曰中國如脩浦洛城我必力爭之常以蕃卒

駐其地時洛苑使白守榮馬紹宗護芻粟四十萬
赴靈州太宗命將輜重先後作三隊丁夫持弓矢
自衛士卒布方陣爲護遇敵則戰可以無失復命
會州觀察使田紹斌率兵應援紹斌抵鹽井繼遷
遣三千騎從枝子平截之且行且鬪至耀德部下
死者千人仍尾紹斌後至浦洛河紹斌復將騎三
百步弩三百搏之乃退旣而轉運副使盧之翰令
守榮等併輜重爲一運行繼遷初見紹斌旗不敢
擊已紹斌與守榮議不合引所部去繼遷先設伏

桑乾河以羸騎誘戰俟官軍逐入大陣麾衆圍之

擊敗守榮兵盡奪糧運

曾氏隆平集守榮紹宗敗紹斌爲擊走賊衆護糧以

行詔褒之攷宋史紹斌傳守榮敗紹斌率所部引還至清遠與張延會食見濠中人裸而呼曰我自守榮也引而上解衣衣之遣內侍馮從順乘驛以聞是紹斌無再護糧行事

夏四月侵吐蕃折平族首領握散請會師討之

吐蕃自唐季衰弱族種分散大者數千家小者百

十家無復統一凡儀渭涇源環慶鎮戎秦州靈夏

皆有之太平興國中諸族以良馬入獻自後進奉

不絕時折平族蕃部賣馬過靈州党項襍部誘繼

遷奪之表訴于朝繼遷益侵其種落于是首領握
散上言久苦侵掠願會兵靈州以備討擊太宗賜
幣荅之

按

此吐蕃請討繼遷之始綱目蠻夷借兵之辭

五曰致助曰請助曰入援順辭也曰發兵曰徵
兵尊辭也曰遣使以某兵至敵辭也曰乞兵卑
辭也曰求救急辭也吐蕃苦繼遷侵掠願會兵
靈州應書請助茲書請討以存中國而惡繼遷
也蓋繼遷既降復叛則夷夏之防君臣之義兩

不容恕故凡與繼遷難者微書擊甚書討書伐
後倣此

攻西涼府

西涼本吐蕃涼州地周圍二千餘里東界原州南
界雪山吐谷渾蘭州西界甘州北界吐蕃領姑臧
神烏番禾昌松嘉麟五縣戶二萬五千有奇宋初
置府淳化中毀直丁惟清奉詔往西涼市馬比至
而境大稔因爲所留至是土人請立帥太宗卽以
惟清知府事繼遷知西涼強盛進攻府城押蕃落

副使折逋喻龍波禦卻之與吐蕃都部署沒暇于
入朝獻名馬以告

五月合党項諸族兵圍靈州索使人張浦

先是兵馬都部署侯延廣知靈州部下嚴整戎人
悅服繼遷不敢犯其境及延廣病去繼遷合党項
兀泥中族首領佶移女女殺族首領越都女女夢
勒族首領越移女女忙族首領越置女女籠兒族
首領党移沒兒族首領莫末移路也族首領越移
細也族首領慶元路才族首領羅保細母族首領

羅保保也等衆數萬圍靈武索取張浦守吏遣使告急繼遷獲其使知城中危窘遂頓兵城下四方館使曹璨自河西入朝悉以狀聞太宗召宰相謀之呂端請發兵出麟府鄜延環慶三道會兵直擣

平夏覆其巢穴繼遷必懷內顧憂如此則靈武圍自解矣或云塞垣表裡沙磧三道兵從何處會合

况盛夏涉瀚海瀚海一名旱海趙珣聚米圖經云鹽夏清遠軍間並係沙磧俗謂之

旱海自環州出青岡川本靈州大路自此過美利砦漸入平夏中經旱海七百里無溪澗山谷難得

水泉錢卽曰瀚海地皆舄鹵或以飲馬口鼻皆裂水泉乏絕糧運艱辛未

見其利不如靜以待之太宗不聽賜敕書招諭諸
 族命十州都部署李繼隆出環州容州觀察使丁
 罕出慶州殿前都虞候范廷召出延州殿前都指
 揮使王超出夏州西京作坊使張守恩出麟州五
 路進援靈武

八月回師援平夏與官軍戰于烏白池敗績

繼遷據瀚海險要久圍靈武城中糧糗俱竭供奉

官寶神寶潛遣人市糴河外以濟間出兵擊之
李氏

長編云實錄正月乙卯命曹璨知靈州為侯延廣
 病故也二月延廣卒據璨傳璨未至即改為麟府

濁輪砮鈐轄及繼遷窺靈州部署郭密亦已卒而
璨復自河西入奏至六月戊戌乃命慕容德豐知
靈州不知夏秋間靈州守臣果係何人獨竇神
寶傳畧見因掇出附此

繼遷不能克

既聞諸將分道出塞知兵勢大恐平夏有失解靈
州圍退走時李繼隆違旨不救靈州由青岡峽橐
駝路徑趨平夏兵行數日與丁罕合又行十餘日
無所見引還張守恩遇夏兵不敢擊率軍歸本部
獨王超與范廷召由鐵門關遇蕃兵一戰破之抵
無定河水源涸絕軍士渴乏會河東轉運使索湘
輦大鍬千枝至鑿井得泉遂賴以濟進師烏白池

繼遷列陣據險兵銳甚超持重不進宋史張昭允傳為河西馬

步軍鈐轄從王超討李繼遷超深入數百里道阻糧絕昭允以所部援之戎人乃敗與李氏長編異

其子德用請為先鋒乘之轉戰三日繼遷敗未幕

軍主吃囉指揮使等二十七人皆被執宋史石保興傳至道

二年與范廷召等五路討賊還至烏白池夏人為方陣來拒保興麾眾出入陣中馬中流矢挺身持

滿易騎大呼行且鬪凡三日四十二戰夏人引去與德用傳異德用曰歸師迫險

必亂領兵距夏州五十里先絕要害下令曰敢亂

行者斬一軍肅然繼遷躡其後見隊伍嚴整不敢

逼李氏長編上初以方畧授諸將先閱兵崇政殿令軍士多習強弩及遇賊萬弩齊發賊不能禦

皆散走凡十六戰而抵其巢穴悉焚蕩之賊中老
弱不能走者繼遷悉埋之沙中但露其首部落降
者咸告曰人馬死者過半不能化矣羌謂
活爲化言不能再活也與宋史諸傳異

冬十月夏州地震

繼遷將寇夏州會地震百餘日城郭廬舍多壞不
敢駐營去

按

夏州地自唐末入于李氏太平興國中始沾
王化于是馬生二駒地產嘉禾方以爲休徵可
喜乃至是而地震是變也震而壞城郭廬舍是
大變也不二年其地復賜繼遷淪爲異域幾三

百年豈非豫爲之兆乎書西夏地震始此

十一月復逐党項泥中族于黃河北

泥中等族舊皆內附繼遷誘之叛不從數以兵侵掠其大首領名悉俄與首領皆移尹遇崔保羅沒諸族帳徙居黃河北避之

十二月攻石堡砦

石堡屬綏州距夏州三百里淳化中趙保忠被擒壁壘殘破邊臣議修葺之量置戍守繼遷遣兵數千四出攻掠以擾其役鄜延巡檢張思均率衆奮

擊繼遷不勝

至道三年

契丹統和十五年

春二月繼遷將史訛遇以兵扼

橐駝口敗死

繼遷以西部內屬者衆遣軍主史訛遇率兵屯橐駝口西北雙埕以遏絕之熟藏族蕃官訛遇以告都部署李繼隆遣副部署劉承蘊田敏會訛遇兵擊之斬首數千級史訛遇戰死失牛馬橐駝萬計夏四月獻捷契丹契丹封爲西平王

繼遷以大敗宋兵告契丹契丹復其西平王爵繼

西夏書事 卷六 七
遷尋遣使謝

五月圍保安軍

保安爲鄜延外障繼遷圍其城副都部署曹璨同
巡檢張思均引兵赴援繼遷解圍走璨等追奔三
十餘里至木場而止

冬十月納靈州叛人鄭美遂攻州城不克

靈州屯戍軍校鄭美違主將令懼罪叛投繼遷說
以靈州可取狀繼遷授指揮使職令爲前導率兵
攻靈州與都部署楊瓊戰于合河鎮北大敗失人

畜無算已以騎五百掠城下又敗退走五十里乃

免衣衣軍帥與夏賊發音精幹挑賊察風置

十二月復上表請降授定難軍節度使復姓名趙保

吉神鼎之州登築萬里之未數也

淳化中保吉納款議者以保吉懷戀父祖舊基別

無他望授以銀州觀察冀滿其意自後攻劫不已

盡降麟府州界八部蕃酋又脇制東山諸部党項

及南山野利諸族其勢益張嗣兀泥等十族皆奉

敕書歸順咩哺族開道使泥埋與其弟屈子子成

逋數以兵攻繼遷繼遷戰不勝會太宗崩眞宗卽位遣使賫詔諭之繼遷舉所部大臨縞素發哀遣牙校李光祚至京修貢表求蕃任意不得夏州不已也眞宗方在諒陰姑從所請命內侍右班都知

張崇貴賜以詔曰先皇帝早深西顧欲議眞封屬

軒鼎之俄遷築漢壇之未逮故茲遺命特付眇躬

爾宜望弓劒以拜恩守封疆而效節特授夏州刺

史充定難軍節度夏銀綬宥靜等州觀察處置押

蕃落等使

司馬光奏狀李繼遷俶擾西陲十有餘年關中困弊眞宗皇帝卽位赦其大罪

割靈夏等州除其子德明爲定難軍節度由是邊境安寧者四十年其說誤復賜姓名

加食邑千戶實封三百戶益功臣號賜賚甚厚錢若

水太宗實錄章得象國朝會要不著繼遷納款月

日其制詞據成材朝野雜編與實錄所載差異又

雜編云事在真宗即位之次年宋史夏國傳亦云

在咸平元年春考太宗紀在至道二年冬十二月

真宗初立後張崇貴傳所載同

按此復受定難節度之始保吉復之德明繼之

恩命縣延四十餘年而後稱帝蓋其圖度經營匪伊

宋真朝夕矣

張浦還

西真書集 卷六
真宗以繼遷既臣加浦鄭州防禦使遣還

宋真宗咸平元年

契丹統和十六年

春正月保吉遣使表讓

恩命

保吉使押牙劉仁謙奉表請讓恩命畧曰天子宅

中聲教訖于海溼王者無外懷柔溥及戎方恭維

皇帝陛下恩深繼絕度豁包荒垂念祖禰之功俾

承堂構之舊全家細小均沐鴻慈合族豪酋同遊

化宇從此以享以祀在天對越堪依斯哭斯歌沒

世首邱可樂皆出于皇帝至仁之所賜也惟是臣

遠處夷落賤屬草莽初無汗馬之勞克勤王事繼
肆憑城之技屢擾邊陲雖蒙聖主施仁神武不殺
自念渺躬負罪夢寐何安謹遣下臣拜上恩命敢
塵旒冕竊冒殿庭望垂日月之明使圖蟻効俯鑒
狂瞽之瀆藉展葵忱元造曲全天恩莫報臣不勝
悚惶待罪之至蓋張浦謀也真宗見表不允賜仁
謙錦袍銀帶遣回

按讓美德也此書表讓譏僞也繼遷表乞夏州
表求蕃任屢言之矣茲忽表讓恩命將誰欺乎

西夏書事 卷六
綱目封拜書讓者三曹操司馬昭劉裕皆著其
僞而已矣

二月以得地告契丹

以得銀夏綏宥靜五州告

夏四月遣弟繼瑗入謝

保吉歸順真宗諭陝西縱綏銀流民還夏州家給
米一斛保吉遣弟繼瑗獻馬入謝授亳州防禦使
封保吉生母衛慕氏衛國太夫人子德明定難軍
節度行軍司馬

五月朔日有食之

食將既

按

日食爲陰勝陽食既則臣叛主兵大起其保

吉復叛之兆乎

秋九月襲綏州熟戶李繼福敗之遂寇鄜延復寇石州不克勒兵據賀蘭山

保吉受節鉞復姓名氣日驕肆知集賢院田錫上言繼遷不合與之夏州又不合呼爲趙保吉雖賜姓與名已自先朝然羈縻無用恐關輔勞擾從此

生國家耗費從此起已與綏州熟戶李繼福構釁
縱所部攻敗之因擾鄜延與鈐轄張崇貴都監王
榮戰失具裝馬數十匹轉攻石州知州韓崇訓率
兵拒之保吉大敗盡棄輜重退屯賀蘭山勒兵據
險守

咸平二年

契丹統和十七年

夏六月保吉掠河西殺指揮使

李璠

保吉引萬餘騎掠河西與虎翼指揮李璠遇于隘
口揮衆圍之璠力戰手格殺數十人身被數鎗馬

中矢仆遂死

秋八月河西羌導攻麟州援將折海超等戰死

麟府緣邊失于撫禦其大族蕃部多投保吉河西
黃女族長蒙異保府州蕃部啜訛誘保吉日麟府
爲河東要地攻易守難若以盛兵乘之唾手可得
得麟府則豳嵐火山諸軍皆可圖矣保吉遂以蒙
異保爲前部啜訛佐之率衆攻麟州由萬戶谷進
至松花砦府州將洛苑使折惟昌與從叔同巡檢
使海超弟供奉官惟信率兵赴援保吉揮衆叢射

惟昌中矢已墜馬忽攝弓起得裨將馬突圍出兵
衆不能禦乃擊海超惟信于陣殺之

附

宋史韓崇訓傳咸平二年再知麟州繼遷來
攻敗之于城下考此事與折惟昌事不合且無
月日可據

九月進犯府州敗還

戎性往來飄忽勢難久持然其民皆兵居易于點
集保吉前圍麟州不克令部下萬私保移埋糾合
蕃族犯府州境與守將折惟昌鈐轄宋思恭戰于

埋井峯敗還

夏州言石隕有文冬十二月出兵攻延安

保吉駐夏州聲言石隕帳前有文曰天戒爾勿爲

中國患蕃漢爭傳之右班殿直盧鑑入奏事眞宗

問之鑑曰此詐也宜益爲備未幾保吉以萬騎圍

延安陝西轉運副使張侂督兵禦卻之

按

書石隕記異也春秋書石隕一綱目書石隕

一十二無書有文者惟秦政三十六年石隕東

郡或刻之曰始皇死而地分越明年其言果驗

茲言石隕有文言有未必有也書以著其詐

夷鎮戎軍

至道中都部署李繼隆于古原州城鎮戎軍當回

鶻西涼六谷吐蕃咩逋賤遇馬臧梁家諸族要路

為環慶原渭儀秦北面捍蔽

李繼和奏疏平涼舊地山川險阻旁扼夷

落為中華襟帶若無此軍寇來有數路自隴山下南去則由三白堡入儀州制勝關自瓦亭路南去則由彈箏峽入渭州安國鎮自青石嶺東南去則由大盧小盧潘谷入潘原縣若至潘原西則入渭州東則入涇州若至青石嶺東公主泉南去則由東山砦故彭陽西並入原州其餘細路不可勝數

嗣保吉納款不復置守保吉率眾夷其城址掠定

軍界蕃族南至渭州安國鎮北二十里西至南市

界三百餘里

附宋史石保興傳咸平二年知威虜軍夏人入

抄保興發帑錢數萬分給戰士主者執不可保

興曰城危如此安暇申覆事定覆而不允願以

家財償之夏人退驛置以聞真宗貸而不問考

威虜軍屬河北路在鎮定二州北距銀夏遼遠

米中隔契丹夏兵豈易到此疑傳有誤

咸平三年契丹統和十八年春二月保吉兵屯蕭關

蕭關唐武州地襟帶涇原咽喉靈武保吉令萬子

米逋西鼠等族三千騎屯聚蕭關以圖原渭靈環

諸路熟戶

夏五月攻濁輪砦

濁輪砦屬麟州鈐轄劉文質擊走之宋史文質傳

來寇文質擊走之乘勝拔其砦賜錦袍金帶
徙知慶州不言其擊保吉事茲從真宗實錄

秋九月復邀靈州糧運殺轉運使陳緯

靈州糧運路由瀚海自冬至春芻粟始集保吉偵

得輒奪之朝議于秋涼解運令慶州發兵護詣靈

州殿中丞鄭文寶素知西州形勢言西人必復邀奪至積石保吉以所部康奴等族萬餘衆夜截之緯與知靈州李守恩拒戰死邠寧副都部署王榮率師赴援亦敗保吉盡得糧運遂頓兵于積石河

按

靈州介在河上復絕一方保吉制瀚海之衝斷飛輓之路關右二十五州之民爲轉輸死者十餘萬人而芻糧二十五萬到者不十之三昔張鑑謂靈州爲西陲要地實中國蠹區旨哉言也議者猶以咽喉重地西北要衝爲惜致糧運

一失再失豈謀國之道乎

冬十一月契丹授德明朔方節度使使取靈州

契丹聞保吉頻掠糧運阻絕瀚海遣使授德明

遼史

作德昭避景宗諱也

朔方節度促保吉取靈州

按書契丹授斥煽禍也朔方以靈州爲鎮治未

得其地先授以官非教之肆兵乎

附

宋史李繼周傳咸平三年復爲先鋒入夏境

焚蕩積聚殺人畜獲器甲凡六十餘萬攷眞宗

紀是年無西討事傳不知何據

十二月使如契丹貢

契丹自保吉歸附諸夷皆從特重所遣人使令禮

臣議進奉朝見儀班在宋高麗之次遼史禮志夏

常朝畢使者左入至丹墀面殿立繼上露臺立少

前拜跪附奏起居訖俯興復位閣門使宣問國主

安否鞠躬聽旨跪奏國主安俯伏興退復位左下

至丹墀面殿立禮物右入左出畢閣使鞠躬通夏

國使姓名候見共一十七拜贊祇候平立有私獻

過畢揖使者鞠躬贊進奉收訖贊祇候引左上殿

就位立與臣僚齊聲喏酒三行左下至丹墀謝宴

五拜畢贊有敕宴五拜祇候引右出禮畢于外賜

宴客省使伴受賜衣物事軍朝辭亦俟常朝後引

使者左入通夏國某使祇候辭再拜不出班起居

再拜出班戀闕致詞復再拜賜衣物如

常儀遇賜宴五拜畢贊好去從右出

西夏書事卷七

青浦 吳廣成西齋 纂

咸平四年

契丹統和十九年

夏四月保吉謀攻西州回鶻回

鶻請兵于朝

回鶻自唐末浸微散處甘涼瓜沙間各立君長分
領族帳時保吉猶駐積石河將西掠吐蕃健馬北
收回鶻銳兵然後長驅南牧西州回鶻可汗祿勝
知其謀遣樞密使曹萬通入貢言本國東至黃河
西至雪山有小郡數百甲馬精習願朝廷命將統

領使得縛繼遷以獻真宗嘉之賜以詔曰夏綏抗
命神人所棄卿世濟忠烈誼篤舅甥繼上奏封備
陳方畧且欲大舉精甲就覆殘妖拓土西陲獻俘
北闕可汗功業其可勝言嘉歎所深不忘朕意今
更不遣使臣一切委卿統制特授萬通左神武大
將軍優賜祿勝器服

按

此回鶻請討保吉之始

吐蕃六谷都首領潘羅支以兵來討

知鎮戎軍李繼和言六谷都首領潘羅支願戮力

討夏州請授以刺史廷議羅支已爲酋帥授刺史
太輕乃以爲鹽州防禦使兼靈州西面都巡檢使
于是羅支遣部下李萬年率兵進討貽書繼和請
師期

擄羌嵬逋走回

嵬逋乃保吉擾河西時掠得者乘間率屬千餘內
投保吉自萬戶谷追之不及

秋七月以下恒環等州告契丹

保吉遣李文驥

遼史夏國傳作李文貴與聖宗紀異

獻于契丹因以

西夏書事 卷一
下恒環慶三州告契丹主賜詔褒之

按

此與前告下麟鄜同僞詞耳何以書罪其妄也僞妄之詞一之爲甚可再三乎

八月遣使獻馬

猶稱所賜姓名然寇掠邊鄙益甚

攻靈州不克田其境地

靈州居平夏西北南去鎮戎約五百里東去環州六七日程中隔瀚海數百里乏水草烽火亭障不相望若聚衆急攻早已不守保吉欲俟中國財用

關輔民力盡耗然後取之是時以五萬騎攻城城中兵少不出戰據其山川險要凡四旁膏腴之地使部族萬山等率蕃卒駐榆林大定間爲屯田計墾闢耕耘騷擾日甚眞宗謀之叅政李至至言靈州雖西北要衝今援絕勢孤不能不棄若移朔方軍于環州保固邊境亦一時之權也乃遣宰相張齊賢行邊齊賢上言靈武孤城必難固守徒使軍民六七萬陷于危亡之地知制誥楊億亦言棄之便輔臣咸以靈州乃必爭之地苟失之則緣邊諸

郡皆不可保宰相李沆曰繼遷不死靈武終非朝廷有莫若遣使密召州將使部分軍民空壘而歸如此則關右之民息肩矣真宗不從以王超爲西面行營都部署將兵六萬援之

九月襲定州及懷遠鎮鎮將李贊自焚死連取保靜永州攻清遠軍破之

清遠據積石嶺在瀚海中去靈環各三四百里四面懸絕保吉攻靈州不克復遣牙將趙光允貢馬潛以衆襲破定州圍懷遠李贊兵不滿百拒戰累

日力盡積藁自焚連破保靜永州攻清遠知軍劉
隱監押丁贊分兵拒守走間使詣慶州請援都部
署楊瓊遣副部署潘璘都監劉文質率兵六千赴
之且曰俟吾繼至已而遷延不進保吉自鼓兵攻
南門令子阿啾督精甲攻北門堙濠斷塹以戰七
日城中力竭兵馬都監段義啟門降保吉兵威益
熾踰支子平直薄青岡城下阿啾德明小字也

按

保吉攻城奪砦未有如此詳書者緣河外五
城乃靈州肩背而清遠據積石之衝屯糧置守

以通環慶援兵尤爲要害自保吉取清遠靈州
遂失聲援矣

冬十月升保靜縣爲靜州

按

此李氏更改郡縣之始

徇唐隆鎮與麟州兵戰于柳撥川不勝

保吉旣得清遠以兵徇唐隆鎮謀從蕭關武延石
門路攻麟府麟州副部署曹璨出蕃兵邀之鎮西
柳撥川保吉戰不利退走三十餘里

十二月攻河外砦降守將李瓊

自清遠軍陷盡焚青岡峽諸砦環慶鄜延麟府以
外近河之地皆屬保吉真宗詔西蕃諸族有能破
夏州者當授節度使賜銀綵茶六萬舉族來附者
給田宅于是蕃部阿朮訛豬訛遇等皆內屬保吉
謂中國誘之率兵攻靈州河外砦砦主李瓊拒守
旬餘保吉知其困遣人招之瓊舉城降

部將臥浪已內降

真宗命補軍主賜之田宅

咸平五年

契丹統和二十年

春正月保吉置市于赤沙橐駝

等路

赤沙川橐駝口兩路爲靈夏二州蕃族屯聚處保
吉各置會貿易以誘熟戶于是歸者日衆中國禁
之不止

三月取靈州殺知州事裴濟改州爲西平府
河外五城相繼陷沒靈州孤堞僅存關陝之民困
于轉輸陷鋒鏑填沙磧者不下數十萬歲荐飢城
中斗米價至十貫裴濟至鎮甫二載謀輯八鎮大
興屯田民間稍有生色保吉集蕃部併力攻之濟

被圍兩月餉援並絕刺血染奏乞救保吉遣兵斷
瀚海要路王超大軍不得進別將張煦出鎮戎軍
入夏州界由白豹鎮抵柔遠川戍兵七百騎邀戰
煦擊敗之星夜赴援未至而城陷濟死焉濟在鎮
有聲望及沒夏人惜之保吉以世爵西平又受契
丹西平王冊典遂改州爲西平府

夏四月使清遠蕃酋僞降邀環慶官軍于白豹鎮不
勝

靈武路目清遠軍入青岡峽數百里皆蕃部所居

漢人使旅經由並在熟戶安泊所求賂遺謂之打

當

如漢逆旅家宿食之值也

習以爲常保吉聞援將張煦引兵

將抵清遠使新降蕃酋僞爲熟戶以甲騎三千約降願給資糧爲餉導煦察其詐亟嚴軍待會環慶路部署張凝率師按部還保吉遣兵邀之凝將敗煦領銳卒赴援一矢殪一大將乃解

五月以下靈州告契丹

初保吉遣使契丹貢馬馳至是又使劉仁勗告下

靈州

六月圍麟州知州事衛居實擊敗之

保吉聲言欲取儀州制勝關將由此大入謀者以告真宗詔徙老幼芻粟內地避之知儀州盧鑑曰

此奸謀也徙之適以示弱不奉詔保吉知不可動

突于是月

宋史夏國傳保吉圍麟州在咸平六年六月真宗紀在五年六月紀傳互異

以二萬騎入河東圍麟州副部署曹璨請濟師真

宗閱地圖曰麟州依險三面孤絕僇力可守但乏

水可憂耳命金明巡檢李繼周部兵星夜赴援未

至保吉據水寨負板四面薄城者五日勢將陷知

州衛居實出奇突擊又夜縋勇士襲之城上鼓噪

矢石如雨夏眾披靡走自相蹂踐死者萬餘人宋史

張進傳咸平中為并代副部署李繼遷寇麟州州

將遣單介間道乞師太原諸將以無詔旨未決進

獨抗議發兵赴援既至

而圍始解與夏國傳異

夏州旱秋七月築河防

黃河自積石經河州合洮河水東北流至蘭州過

鳴沙河應里州北繞靈武由懷遠縣入夏州酈道元水

經注黃河自薄骨律鎮北經典農城東又北經上

河城東又東北經廉縣故城東又北與枝津合又

東北經渾懷障東又北至石崖山方至夏州朱思

本河志云河自古積石流五百餘里過河州又東

六

北流百餘里過踏白城銀川寨與湟水合又東北
百餘里合洮河東北流過達地至豐州西受降
城折而正東過古天德軍中受降城復折正南與
黑河合又南流過保德州葭州入興州境合于吃
那河俱與潘昂
霄河渠志異
向有古渠二曰漢源長袤二百五

十里

一名漢渠後漢書西羌傳順帝永建四年尚書僕射虞詡奏復朔方西河上郡乃使謁者

郭瑒激河浚渠為屯田省內郡費
億萬計今在寧夏府寧朔縣南
曰唐梁長袤三

百二十里

一名唐渠唐書李聽節度靈鹽境內有古光祿渠廢久聽復開決以灌田攷漢

書太初三年夏四月遣光祿勳徐自為築五原塞
列城西北至盧朐遂名為光祿塞則光祿故渠應
即自為所開唐因其舊而復修
之也今在寧夏府寧朔縣西
夏州自上年八月

不雨穀盡不登至是旱益甚保吉令民築堤防引

河水以灌田役人有小過輒繫頭投之河使人就下流接視蕃人則出之漢人則沉之

按書西夏河渠始此

渡河攻党項莊浪族不克

莊浪族數萬帳居黑山北廣袤數千里東接契丹北鄰塔坦南至河西大涼小涼諸族中隔銀夏道路遼絕其首領龍移昧克或稱莊浪昧克素不與保吉合常以馬附藏才族入貢頗勤外禦真宗授龍移爲安遠大將軍昧克爲懷化將軍以褒之保

吉惡其不附已舉兵渡河襲之大敗而回

八月大雨河防決

雨九晝夜不止河水暴漲防四決蕃漢漂溺者無數

按

黃河源遠而高流大而疾歷代爲中國患惟靈夏諸州咸受其利昔太史公河渠書言朔方河西酒泉等郡皆引河水及川谷順其趨下之性入渠漑田數萬頃故旱澇不能爲大害今保吉逞其小智勞民動衆妄事曲防宜其潰不可

支也

九月破濁輪砦党項折勒厥麻諸族皆內奔

保吉以澍雨彌旬田稼盡沒謀取糧于緣邊諸砦
會部下教練使李榮挈族內投保吉憤甚復入麟
州攻濁輪破之殺掠甚慘党項折勒厥麻等三族
恐被侵奪率屬千五百帳越河請內屬眞宗命分
處邊境邊臣言折勒厥麻向爲保吉黨恐復叛去
乃徙置憲州樓煩縣地

進圍府州

麟府路鈐轄張佶率兵拒戰酋領中矢死者二人
餘衆退還大寨

冬十月遣使誘六谷諸蕃首領潘羅支執之

六谷分左右廂左廂副使折逋游龍鉢實叅羅支
軍事眞宗方務綏懷命龍鉢領宥州刺史其六族
首領褚下箕等皆爲懷化將軍保吉用兵買馬必
由西涼惟恐梗塞遣人以鐵箭誘六谷諸蕃叛附
羅支戮一人繫一人表聞候旨眞宗褒諭之聽自
處置

十一月涇原官軍襲康奴族援之不及

康奴恃其險衆桀黠難制屢導保吉抄掠靈州糧
運涇原部署陳興與副部署曹瑋率衆潛行直抵
巢穴康奴出不意人畜窖粟悉被搃獲保吉聞之
赴救興等已退

十二月與賀蘭山大小涼族構兵

二族居賀蘭山北部衆甚盛初合于保吉繼有隙
迭相攻掠咩逋族首領遣使以聞真宗特詔使者
激二族兵討保吉

咸平六年

契丹統和二十一年

春正月保吉建都西平

初保吉居夏州修復寢廟撫綏宗黨舉族以安及得靈武愛其山川形勝謀徙都之弟繼瑗言銀夏係累世經營祖宗靈爽實式憑之今恢復未久遽爾遷棄恐擾衆心保吉日從古成大事者不計苟安立大功者不徇庸衆西平北控河朔南引慶涼據諸路上游扼西陲要害若繕城浚濠練兵積粟一旦縱橫四出關中將莫知所備且其人習華風尙禮好學我將藉此爲進取之資成霸王之業豈

平夏偏隅可限哉遂令繼瑗與牙將李知白等督
衆立宗廟置官衙挈宗族建都焉

按

此西夏建都之始

盡復綏宥諸州地

保吉雖授定難軍節度而綏宥諸州尙屬中國及
建都西平兵力日盛眞宗遣張崇貴王涉議和盡
割定難軍州地與之于是保吉盡收緣邊七鎮東
西二十五驛南北十餘驛地爲己有尋葬其祖于

紅石峽

賈漢復陝志繼遷葬其祖彝昌于紅石峽彝昌非繼遷支志誤

障水別流

鑿石爲穴旣葬引水其上後人莫知其處

按

此復全定難五州之始宋以靈武不守并棄綏宥保吉從此據朔方併西涼丕基式廓宋實有以成之嗚呼雖曰天命豈非人事哉

二月出駐鐵子山復以鐵箭誘六谷首領潘羅支不
答

初羅支遣咩逋族蕃官成逋至鎮戎軍請會兵討保吉邊臣以無文牒疑爲詐護送部署司成逋懼而逸馬蹶墜崖死眞宗令渭州以禮葬保吉聞之

引衆自靈州出屯鏃子山放還六谷投去蕃部遣人復送鐵箭羅支稱已納款朝廷願與結好羅支不答

潘羅支謀取西平府三月請兵使還遣人奪其告敕潘羅支數與繼遷戰奪人畜甚衆時以靈州無備遣蕃官吳福聖臘入貢言感朝廷恩信憤保吉倔強已集騎兵六萬乞會王師收復靈州眞宗以保吉常在地斤三山之東每來寇邊師出則遁使六谷部族近塞捍禦與官軍合擊亦國家之利也遂

加羅支朔方軍節度靈州西面都巡檢使賜鎧甲
器幣又以吳福聖臘爲安遠將軍次首領元佐等
七人爲懷化將軍使出兵共圖保吉吳福聖臘還
過西平保吉遣人邀之盡奪羅支牌印官告及所
賜衣服器械吳福聖臘僅以身免

牛羊蘇家等族襲夏州族帳二百人被殺

自靈武失守綏銀割棄中國所得役屬者不過河
外諸小羌餘皆心懷去就叛服不常牛羊蘇家二
族恃其險遠嘗與保吉數入邊邊吏招諭不聽時

河西蕃族拽浪南山及葉市族囉埋同弟囉胡率
 百餘帳持保吉署牒請內附真宗授以本族指使
 等官二族心豔之反兵襲夏州殺族帳二百餘環
 慶部署上其功真宗詔厚賜之

吐蕃者龍族與潘羅支攻夏州拒卻之

者龍族居移卑陵山首領厮敦琶與潘羅支協力
 攻夏州不勝已遣使入朝稱集本族騎兵願隨大

軍西討真宗優賚之
宋史吐蕃傳咸平六年八月

者龍族首領來貢上嘉其嘗
 與潘羅支協力抗賊令優待之又党項傳咸平六
 年二月涇原部署言者龍族移卑陵山首領厮敦

晉遣使言已集騎兵願隨軍討賊是一族分見兩
傳也然羅支爲吐蕃屬則與羅支協力應屬吐蕃
宋史入黨
項傳誤

銀夏宥三州飢夏四月徙其民于河外五城

三州荒旱飢殍相望保吉籍州民衣食豐者徙之

河外五城不從殺之于是蕃漢重遷嗟怨四起

按

書西夏災侵始此

攻環州圍洪德砦

保吉前掠環州擄虎翼軍士魏瓊等四人置之屬

下至是逃歸保吉逐入環州攻洪德砦蕃官慶香

與札耨慶族合勢接戰砦主段守倫率兵策應保
吉敗首領被擒者四十九人墜崖墜死者甚衆悉
棄旗鼓鎧甲走還
攻白馬族破之

白馬亦環州蕃族其首領與保吉鬪不勝徙帳避
之遣使入告真宗賜以廩粟

五月聚兵浦洛河

環慶二州川原平直兩邊雖有土山山外皆高原
川谷內屬戎人與西界蕃族錯居保吉屢經脇誘

環慶副部署張凝領兵由木波鎮直抵八州原下
寨招降岑移等三十二族又從淮安鎮入分水嶺
降麻謀等二十一族柔遠鎮降巢迷等二十族遂
攻業樂鎮降都樹羅家等一百餘族合四千八百
戶銀夏大震保吉與子阿哆集兵屯浦洛河護衛
諸羌西面部署以聞真宗詔鎮戎軍洪德砦嚴斥
堠整軍旅互援之

六月駐東關鎮掠河東

東關鎮在靈州東三十里保吉以部下飢亂挈其

族黨三萬人樹柵居之分掠河東邊境與豐州蕃

瓦窰沒劑加羅昧克等族兵頻戰不勝于是隴山

西延家族首領禿逋內附折勒厥麻暨西蕃八部

二十五族皆願出兵會圖靈夏

按于時銀夏飢荒靈州殘亂保吉至于野次可

謂窮矣宋不因隴山諸族之附乘其敝而圖之

非其智力有不足實天之默相李氏者深也

秋八月攻麟州敗于屈野河

麟州數受侵掠常屯重兵境上而輸餽悉仰河東

中隔河津之阻粟價貴賤不常眞宗命河東轉運使鄭文寶于府州定羌軍置浮橋通之人以爲便保吉擁衆入麟州謀奪餉道八族都校明義潛兵伏屈野河側擊之保吉大敗喪失甚衆自是不敢犯麟府

九月夏州教練使安晏內附

晏與其子守正俱內屬授殿直賜衣服緡錢

冬十月襲西涼府破之殺知府丁惟清改府爲州

保吉嘗言我與西涼自來無事向爲萬山等族所

西夏書事 卷十 其
誘與之構隙今六谷衆盛難以加兵不復進取蕃
部信之是時境內日窘抄掠鮮獲盡籍五州丁壯
大會諸族于鹽州聲稱分屯橐駝車箱峽兩路入
攻環慶而潛移兵取西涼襲破其城執惟清殺之
悉逐居人城外據其府庫復府名爲州兵勢復振

按

于是西夏勢成而靈州永固矣蓋平夏以綏
宥爲首靈州爲腹西涼爲尾有靈州則綏宥之
勢張得西涼則靈州之根固况其府庫積聚足
以給軍需調民食眞天府之國也嗣後保吉身

亡德明終能保守靈夏豈非涼州畜牧甲天下
藉以養成銳氣哉

還自西涼戰于石門川敗績

保吉以西涼鹵獲運回西平抵石門川鎮戎軍知
軍曹瑋伏兵川側邀之保吉麾衆迎戰不勝盡棄
所俘走

夏州蕃官劉贊時又內附

保吉虐用蕃族部下突陣指揮使劉贊與銀州牙
校時又率族內奔真宗授以官賜器甲粟帛慰撫

之已而曹瑋移書銀夏諸蕃諭以恩信于是豪酋
移移等族皆棄保吉由贊等請附保吉禁之不止
十一月有星孛于東井

大如杯色青白光芒四尺餘貫五諸侯

按

孛爲兵凶之象保吉君臣寡學無術不能鑑

此宜其及也

出兵攻六谷朔方節度使潘羅支以者龍諸族衆擊
敗之奔還西平

初保吉奪羅支牌印官告知中國已授朔方節度

心惡其逼舉大衆往攻羅支見勢盛僞使請降保
吉坦受之張浦曰兵務慎重貴審敵情羅支倔強
有年未挫兵鋒遽爾降順詐也不若乘其詭謀未
集一戰擒之諸蕃自伏若懸軍孤立主客勢殊未
見其可保吉曰我得涼州彼勢已促力屈而降何
詐之有况殺降不祥爾勿疑以阻向化之心且先
返西平我當撫安餘黨以免後患浦怏怏而回于
是羅支陰集六谷諸豪及者龍族兵數萬合擊之
于三十九井保吉大敗中流矢奔還靈州

按

保吉叛亂幾二十年諸蕃相角不能稍挫其

威羅支累請討擊至是竟伸其志故六谷者龍

合兵破敵特書羅支以者所以歸功于羅支也

十二月復聚衆浦洛河

聲言攻環州以創甚不果

兼下... 蕃自... 悉軍... 立主... 容... 未

... 未... 蕃... 不... 乘... 未

... 蕃... 重... 審... 未

西夏書事卷七終

西夏書事卷八

青浦吳廣成西齋西纂四書

景德元年

契丹統和二十二年

春正月保吉卒

去官其不詳

保吉創勢日增自度孤危囑德明日爾當傾心內

屬一表不聽則再請雖累百表不得請勿止也

李氏

長編云觀德明初報張崇貴書云未葬難發表章意猶倔強不服朝廷多方招諭僅得其款附耳疑繼遷此等語或德明假托故二年後乃言之非實情也考數語見宋史向敏中傳載在景德初故列于此
又謂張浦曰公等並起等夷誼同兄弟孺子幼長兵間備嘗艱苦今俾以靈夏之眾雖不能與南

北爭衡公等戮力輔之識時審務或能負荷舊業

為前人光吾無憾矣言訖卒時月之二日也遼史統和

二十一年夏五月丁巳西平王李繼遷薨其子德昭遣使告哀統和二十一年宋咸平六年也王氏

東都事畧及李氏長編亦云咸平六年冬繼遷中

流矢至靈州三十里死考宋史夏國傳景德元年

正月二日卒真宗紀景德元年二月環慶年四十

部署奏李繼遷死潘羅支獻捷前三書誤

一作年四十二查帝紀年數自知

景祐元年綱目去官書卒多貶詞保吉去官明其不得

西夏死而書卒何則以保吉為西夏之祖傳祚繼世

要非隗囂公孫述等無成者比也故以僭國創業例書

論曰繼遷生而英奇長而慄悍方其任司蕃落地據銀州當繼捧入覲之初鮮引義力爭之舉蓋懟其兄也素矣迨詔使護送諸父昆弟連袂歸朝方始奮其雄才策其群力激羌戎以先烈約契丹爲強援遂使關右震驚中朝盱食控弦靈武扼平夏之要衝驅馬涼州成河西之右臂于是五州盡復諸族懾從逆者攻以兵順者役

其衆卒之暴戾速亡驕盈致敗不死于天討而
死于流矢佳兵不祥理固然耶然夏綏傾覆沙
磧流離田少一成卒無一旅終能恢萬里之基
創累世之業亦可謂有志者事竟成也

子德明嗣

德明保吉妻野利氏生深沉有器度多權謀時年
二十三嗣位于保吉柩前稱定難軍留後以左都
押牙張浦兼行軍左司馬綏州刺史趙保寧兼右
司馬指揮使賀承珍兼左都押牙劉仁勗爲右都

押牙破丑重遇貴爲都知蕃落使白文壽賀守文
爲都知兵馬使何憲白文贊爲孔目官郝貴王旻
等爲牙校復以李繼瑗爲夏州防禦使李延信爲
銀州防禦使其餘陞賞有差

二月告哀于契丹

契丹主贈保吉尙書令遣西上閤門使丁振弔慰
遼史禮志夏告終使至契丹主于行宮左右下御
帳設使客幕次于東南使者入有司以嗣子表狀
先呈樞密院准備奏呈先引北面臣僚各常服近
御帳相對其餘臣僚並朝服依班位序立引使人
右入至丹墀面殿立引右上立揖少前拜跪奏訖
宣問若嗣子已立恭身受旨奏訖復位嗣子未立

不宣問引右下丹墀面北鞠躬通班畢引面殿再拜奏聖躬萬福再拜出班謝面天顏復位再拜出班謝遠接復位再拜贊祇候退就幕次再入依前面北鞠躬通辭再拜敘戀闕再拜贊好去乃畢

三月麟府兵襲神堆禦之失利

夏州蕃部寇洪德砦閤門祇侯段守倫率兵拒之力戰三日擒獲甚衆事聞眞宗諭緣邊部署鈐轄乘保吉死速圖攻取之策于是麟府路出兵攻神堆夏兵戰不勝營柵盡破

始遣使如鄜延

鄜延鈐轄張崇貴移書德明諭以朝廷恩信德明

遣使報稱未葬難發表章請俟釋服稟命崇貴請
遣使弔問令大臣至邊召其親信張浦等議之

夏四月夏州蕃部指揮使都尾走降于洪德砦

環慶邊臣皆以德明初立乞行招撫知鎮戎軍曹
瑋言繼遷擅河南地二十年兵不解甲使中國有
西顧之憂今其國危子弱部族離心不卽乘此捕
滅後更強盛不可制矣願假臣輕兵出其不意擒
德明送闕下復河南爲郡縣此其時也真宗欲以
恩致之詔德明審圖去就並諭蕃族萬山萬遇龐

羅逝安鹽州李文信萬子都虞候及都軍吳守正
馬尾等能率部下歸順者授團練使銀萬兩絹萬
匹錢五萬緡茶五千斤其有亡命叛去者皆釋罪
甄錄諸蕃以保吉殘暴久不聊生聞詔書招撫爭
觀之無不泣下于是夏州蕃部指揮使都尾率屬
入降 張溥曰西事自靈州之陷夏乃日逞迨繼
遷死德明初立斯時國危子弱真宗不從曹瑋之
請恢復河南至元昊習兵而宋重困矣但慕春秋
不伐喪而不知臥榻鼾睡太祖有明戒也譏宋亡

者云聲容盛而武備衰議論多而成功少于夏事
已見之矣

五月子元昊生

德明三娶一衛慕氏次咩米氏次訛藏屈曠氏衛
慕氏銀州大族嘗與德明游賀蘭山夜夢白龍繞
體遂有妊懷十二月至是月五日生啼聲英異兩
目奕奕有青光德明愛之字為嵬埋
曾氏隆平集
作小名崖塊
國語謂惜為嵬富貴為埋也

涼州亂遣兵攻之不克

西涼自保吉死與蘭州龕谷宗哥覓諾諸族謀拒
夏州德明遣兵攻掠朔方節度潘羅支率蕃衆禦
之夏兵不勝而還

趙保忠死

保忠狀貌雄毅居環列奉朝請常怏怏不自得咸
平中丁內艱以本官起復遷金吾衛上將軍判岳
州移復州至是病劇上言有子永奇凶惡不受教
訓乞配春梅州真宗以戎人獷悍且病語不實授
以永州別駕使監軍察之保忠尋卒贈威塞軍節

度使天禧中錄其孫從吉爲三班奉職

按

保忠臣于宋歿于宋何以書于夏編終其入
朝獻地事也去官書死何惡反覆也反覆雖王
侯之貴與蠻夷盜賊同書所以誅奸頑于身後
而立名教之防也

六月發兵攻者龍族殺朔方節度使潘羅支
初保吉死潘羅支使其甥廝陀完獻捷已遣兄邦
逋入奏欲更舉部族及回鶻精兵直抵賀蘭山討
除殘孽請發大兵援助真宗詔涇原部署陳興鼓

西夏書事 卷八
六
衆赴石門策應兵未發保吉故黨迷般囑及日逋
吉羅丹二族亡歸者龍共圖羅支以報仇者龍凡
十三族其六族附迷般等迷般陰請德明遣兵攻
者龍羅支率百餘騎赴援議事間二族猝起戕羅
支于帳下事聞贈羅支武威郡王

復取涼州

潘羅支死西涼大亂六谷諸酋共推羅支弟廝鐸
督爲首領德明乘人心未定率兵復攻西涼取之

秋七月葬保吉于賀蘭山

在山西南麓寶元中元昊稱帝號爲裕陵

八月萬子軍主以兵寇永寧砦

萬子軍主與萬山萬遇等族同附保吉數爲中國
患鄜延鈐轄張崇貴築臺于保安軍北召戎人所
親信者與定盟約歸順者日衆萬子軍主不應率
屬犯永寧砦知鎮戎軍曹瑋與河西藥令族合蒜
合擊敗之斬首二百餘級于是蕃官茄羅兀臧成
王等皆獻馬贖罪請內附

九月使如契丹謝弔贈

西夏書事 卷八
并以保吉遺物獻

冬十月銀州屬蕃侵麟州

銀州蕃族乘潘羅支身亡聚衆攻麟州西京作坊使李繼周率兵會永寧軍主李繼福擊退之

十二月孔目官何憲走降于邠州

憲靈州人保吉破州城時得之愛其才使掌兵數事德明立授孔目官嘗勸德明勿殺潘羅支以爲後日納款計不聽乃挈家乘間走邠州請降部署以聞眞宗詔令乘傳赴闕

景德二年

契丹統和二十三年

春正月德明遣趙保寧如契丹

請封

德明嗣職期年未膺封冊蕃族多懷觀望行軍司馬趙保寧言國家疆宇雖廓自西涼擾亂先王被害蕃衆驚疑若不假北朝威令懾之恐人心未易靖也德明遂遣保寧獻方物契丹以請封冊契丹主曰此吾甥也封冊當時至待保寧加禮遣回

二月以下青城告契丹

契丹自澶州之敗雖與中國講和其戎心未嘗一

日忘故許德明封冊以爲臂使之需德明欲臣中國慮其見疑乃以兵下青城告

按

青城之役宋遼二史不載亦僞詞也德明嗣位未幾詐僞一如乃父洵亂世奸雄哉

出兵寇環州破旺家族執首領都子

蕃部累奏德明迫脇攻劫狀真宗命安撫使向敏中諭之敏中言掠去蕃口勢不能給還惟令自作要約以絕後犯德明不聽舉兵入環州境攻熟戶旺家族執都子等去都子所部亦獲德明軍主慶

吉以獻

附

宋史吐蕃傳景德二年廝鐸督遣甥阿昔來
貢且上與德明戰功狀並言蕃帳周斯那支有
智勇請授六谷都巡檢使上從之攻李氏長編
載此事于是年二月其戰在何時真宗紀及夏
國傳皆不書

夏六月遣牙將王旻入貢請降

德明聞石隰部署耿全斌率兵入伏洛關招誘蕃
族諸部內附者數千人禁之不能止謀之張浦曰

先王遺命應卽表聞緣降之太易彼將輕我今兵
復西涼國威已振請之此其時矣乃遣王旻以保
吉遺言奉表入獻畧曰同軌同文王者大車書于
一統至神至聖遠人瞻天日于無疆臣父承闔邊

陲蒙恩優渥方且心乎王室拱北極而抒誠靡意

難起同袍

謂黨項諸族也

糾西蕃而生事遂致鞠躬盡瘁

賫恨莫伸然而戀闕深情平時懇切作忠遺教垂
沒叮嚀臣賦性顓蒙素懷恭順向居苦塊欲進表
而無由今屬禫除敢請臣之或後恭惟皇帝陛下

德超邃古道建大中海不擇乎細流朝宗者必納
山豈遺乎土壤環向者咸依伏望俯鑒孤忠得盡
小心翼翼垂憐微末克遵先訓諄諄存沒啣恩子
孫感德云云真宗見表賜旻錦袍銀帶遣侍禁夏
居厚持詔荅之賞給甚厚已遣閣門通事舍人焦
守節諭張崇貴以保吉昔時變遷之狀今當使德
明白爲誓約納靈州土疆止居平夏遣子弟入宿
衛盡散蕃漢兵送還掠去官吏及質口封境之上
有侵擾者稟命朝廷令旨凡七事則許德明以定

西夏書事 卷八
十一
難節度子歲賜給內地節度俸聽回圖往來及放行青鹽凡五事崇貴等呼旻示之如能順命卽降恩旨繼而德明使張浦詣崇貴面議但多邀求不肯自爲誓約也

秋七月契丹冊爲西平王

契丹主使北院樞密副使蕭承德持節封德明西平王復姓李氏賜車旗衣幣等物

九月都知兵馬使白文壽入貢

真宗以德明誓約未定命樞密使向敏中自永興

軍赴鄜延經畧之敏中使人招諭德明乃遣文壽
入貢

冬十月趙保寧如契丹謝封冊

義成公主無所出契丹冊德明時諭以善事公主
克光先烈德明遣保寧往謝且曰恪遵諭詔未敢
有違也

十二月教練使郝貴入貢

中國答賜甚厚

博州防禦使李克文卒

克文在鎮恭謹守法保吉之亂口不言兵卒贈岳
州防禦使大中祥符中子繼元爲閤門祗候上表
言已與繼遷本五從兄弟名同上字心甚恥之願
改名守元眞宗詔從之擢供備庫副使厚其廩給
按具官書卒錄賢也克文實肇夏州之禍然非
其意料所及况入朝以後頗稱恭順卽博州之
置亦不聞稍有怨悻較之保忠可謂李氏賢裔
矣故仍得書于夏編

景德三年

契丹統和二十四年

夏四月德明妙娥等族走降于

鎮戎軍

夏州妙娥熟鬼數大族見德明孤弱以蕃書移鎮
戎軍請拔帳自歸諸將猶豫不敢應知軍曹瑋曰
德明野心不折其翮後必飛揚即日將兵出石門
薄天都山受降者內徙諸小族皆望風納質德明
不敢拒

遣使貢馬表乞恩命

德明先遣左都押牙賀承珍獻馬已遣兵馬使賀
守文入貢先是向敏中張崇貴屢與德明書議立

誓約德明遷延其辭于七事未肯承也表文但云
乞先賜恩命餘徐議之

六月周伯星見遣使入賀

德明聞中國司天奏周伯星見復遣賀承珍入賀

秋七月獻馬謝賜

德明獻馬五十匹謝連次賜荅之物真宗復賜襲
衣金帶器幣並諭自今荅賜勿復謝恩

熟戶潘保薛等內投表請誅之不得

保吉曾掠延州蕃部潘保薛四族安置綏州已而

挈族內奔鎮戎軍鈐轄秦翰出兵應之德明訴于
朝願舉刑章翰言四族本延州熟戶茲還舊居非
新有招納也真宗詔張崇貴移報德明自今勿復
侵預境外

八月謀侵麟州

河東蕃落諸將因德明信約未定皆訓練士馬料
率器械以待德明謂其圖已點集諸族戎人謀入
河東掠麟府諸州內屬蕃戶偵知以報向敏申請
命帥臣鎮之已而德明兵不出

命按謀侵未侵也何以書誅其心也于是抄掠之

計集議已定特因事機洩露聞有備中止耳書

率以罪之命論其圖曰無兼蓄其人心人

斬渭州叛卒于境上命論其謀未定書隔縣士

入渭州戍卒十餘人叛入夏州德明納之偵者以告

都鈐轄曹瑋瑋方與客奕佯怒曰我固遣之汝顯

言之何也德明聞即斬叛者投其首于境上命

九月遣使進誓表言四蒸本或州縣已茲設書司其

先是真宗詔許德明毋納靈州止遣子弟入宿衛

及母得攻劫西路進奉蕃部縱有爭競並取朝廷
和約他約悉除之然猶不聽回圖往來禁放青鹽
至是河西諸羌多請內附眞宗因德明歸順下詔
諭止令其各守疆場德明感恩遣右都押牙劉仁
勗奉誓表請藏盟府且言父有遺命永無貳心又
言所乞回圖及放青鹽禁雖宣命未許然誓立功
効冀爲後日賞典也

此按

此西夏進誓表之始

行牒索降蕃于鄜延

景德初綏州蕃部指揮麻結內附真宗命給府州地居之德明行牒鄜延請還本道朝議以麻結降在進誓表前諭止之

按此西夏行牒之始

冬十月復受定難軍節度使爵西平王

真宗嘉德明降授特進檢校太師兼侍中持節都

督夏州諸軍事行夏州刺史上柱國充定難軍節

度夏銀綏宥靜等州管內觀察處置押蕃落等使

宋史石普傳趙德明納款詔降制命鄜延路都總管石普言不宜授以押蕃落使使之總制屬羌則

強不可制矣乃止兼管
內蕃落使與夏國傳異
爵西平王食邑六千戶實

封三千戶又賜推忠保順翊戴亮節功臣號遣內

侍左右班都知張崇貴太常博士趙湘充旌節官

告使賜襲衣錦帶銀鞍勒馬銀萬兩絹萬匹錢三

萬貫茶二萬斤
劉平曰趙德明僻守一隅畏王

師問罪數馳驛奏願備藩臣于時朝廷若止棄銀

夏綏靜四州限山爲界則德明遠居漠北可無後

日患矣乃以靈宥兩州及山界人戶并授之山界

蕃漢勁勇善戰使德明得畜甲治兵漸滋邊患此

鄜延環慶涇原秦隴諸州終不能弛備也

按

此李氏復王爵之始

責子弟入質不遣

詔使數責子弟入質德明以入質非先世故事不

肯遣惟獻御馬一十五匹散馬七百匹橐駝三百

頭謝恩

十一月使請俸賜

德明使至京師特請俸子因市禁物隱關算爲奸

利朝議聽之自是歲以爲常

十二月環州降酋蘇尙娘叛執之

西界蕃部奔投內地者德明輒入境追逐久之不止乃表言臣所管蕃族近日多投鎮戎軍蓋秦翰等招納不已也今臣已受朝命乞賜曉諭眞宗以表示邊臣止之環州酋蘇尙娘曾禦保吉有勞屢告夏州機事授臨州刺史已叛投德明至是復求內附部署以聞廷議以尙娘反覆無信特恐狙詐以誤邊吏又使德明緣此爲辭不可納也德明聞遣兵執尙娘歸

國其降者其...
 以...
 內...
 古...
 表...
 後...

也...
 西...
 西...

西夏書事卷八終

西夏書事卷九

青浦 吳廣成西齋纂

景德四年

契丹統和二十五年

春三月德明使謝廩俸

宋制節度使俸給錢四百千粟一百五十石春冬
夏加絹各百匹大綾各二十匹小綾各三十匹羅各
十匹綿各五百兩惟諸王皇族充節度及藩鎮管
軍節度則有之外蕃遙領者不與焉真宗賜德明
廩俸悉與內地節度同德明感恩遣使奉表自稱
草土臣獻馬五百匹橐駝三百頭以謝故事賜物

謝恩止給來使緡帛真宗以德明進奉頻數加賜

襲衣金帶器幣

請于京師市易

德明表請進奉使至京師市所需物詔從之

夏四月建館舍于綏夏二州

德明以中國恩禮優渥天使頻臨遂于綏夏州建

京館舍王曰承恩曰迎暉五百里內道路橋梁修治

整飭聞朝使至必遣親信重臣郊迎道左禮儀中

節漸有華風

五月母罔氏卒遣使告哀

德明嫡母罔氏卒遣都押牙賀承珍詣京師告哀

真宗命殿中丞趙稹爲弔贈兼起復官告使授德

明鎮軍大將軍右金吾衛上將軍員外置同正員

餘如故德明以鼓樂迎至柩前明日衣禫衣受賜

泣對使者曰蕃夷母喪蒙天子弔贈起復寵榮極

矣及葬請修供五臺山十寺爲母祈福真宗遣閣

門祇候袁瑀爲致祭使隨護送德明所供物至五

臺

李氏長編德明請詣五臺寺修設追薦其母陳堯叟欲令張崇貴諭以路由河東多涉軍壘不

便聽由鎮州路上曰宜令崇貴荅以不敢奏聞若誠願則聽致施物于鄜延委崇貴差人送五臺也與宋史夏國傳異

按

此西夏告哀中國之始

契丹使來弔祭

且賜起復

行牒延州請止保安軍修驛

自德明納款真宗令緣邊城池依誓約應行修葺外自餘移徙砦柵開復河道無大小悉禁之時保安軍起葺驛舍德明移牒延州言邊民擾懼不安

願罷其役從之

六月貢馬助皇后園陵

章穆皇后初葬德明獻馬五百匹助修園陵真宗

嘉納之

索夏州民劉岩等不得秋七月請置榷場于保安軍

先是夏州民劉岩等二十餘人內屬給以延州曠

土耕之而所居當綏州要路德明部族出入多爲

搶戮及德明歸順移牒求岩等復還真宗難之頗

嚴邊禁德明請置榷場于保安軍許蕃漢貿易朝

西夏書事 卷九 三
議從之令以駝馬牛羊玉玷琰甘草易繪帛羅綺
以密蠟麝香毛褐獬羚角硃砂柴胡菴蓉紅花翎
毛易香藥蠶漆器薑桂等物其非官市者聽與民
交易夏代其國者二十餘人內羅餘以或州

索夏

按

此西夏復互市之始

九月出兵攻六谷不果行

六谷諸酋久推忠順自潘羅支死折逋游龍鉢等
盡歸德明部下惟羅支弟朔方節度西涼府六谷
大首領厮鐸督猶與德明抗德明以六谷世仇意

將阻絕使人使不得列于緣邊屬戶侵掠無虛日
廝鐸督潛以蕃書入訴真宗令張崇貴諭之德明
不聽率兵屯境上謀取六谷廝鐸督援結回鶻爲
備德明兵不出

冬十月請行儀天歷

宋初用周時舊歷建隆三年始命司天少監王處
訥別造新歷命名應天太平興國中改爲乾元真
宗嗣位命司天監史序攷驗前法研覈舊文取其
樞要成儀天歷時咸平四年三月也西夏自保吉

倣擾羌戎不知正朔幾二十年德明遣貢使表請
真宗以新歷并冬服賜之初詔延州牙校賫往比
聞德明葺館舍修道路以待朝命乃命閣門祗候
往賜德明受而行之

按此西夏受歷之始

十一月請于麟州置榷場

真宗以延州已置不許

大中祥符元年

契丹統和二十六年

春正月德明賜守正功臣

號

益食邑千戶實封四百戶時天書降于承天門故
有是賜守正乃賜中書樞密號也

出兵侵甘州回鶻

回鶻有甘州沙州西州新復州數種而甘州地逼
西夏其可汗夜落紇嘗與沙州可汗祿勝數出兵
爲保吉難保吉死德明思報怨遣將張浦率騎數
千抄掠其境夜落紇出兵拒之浦不能勝

三月復遣萬子等族襲甘州大敗

張浦兵還德明遣萬子等四軍主悉其族兵取六

谷進圖甘州萬子軍主至西涼見六谷兵盛不敢
攻徑趨甘州襲回鶻回鶻偵知設伏示弱不與鬪
俟其過奮擊之剿殺殆盡軍主挺身走免其被擒
者回鶻驅坐于野悉以所獲資糧示之曰爾輩狐
鼠規求小利我則不然盡焚訖乃殺之

夏四月請市青鹽

鹽乃中國利藪鹽州五原縣烏白池所出青白二
鹽味勝解池邊人商販者多西戎久擅其利自保
吉騷動禁止入塞德明初附時力請放行不得是

時見朝廷恩禮日隆致書于鄜延部署張崇貴請
之崇貴以聞真宗以德明所納誓表付崇貴諭之
蓋向未載放鹽事也

五月夏州屬戶擾涇原

涇原向少籬籬保吉時鈐轄秦翰規摩要害嘗以
三十萬工鑿巨塹數年而成保吉遂不能入寇時
夏州屬戶以德明納款輒越塹侵掠涇原德明不
禁真宗遣翰巡視邊部夏人聞翰至懼而退

六月綏銀夏三州旱

兩河並旱夏三州旱

綏銀以大理無定兩河爲灌溉近甘涼間則又有
居延鮮卑沙河諸水襟帶迴環故歲無旱澇之虞
是時天時亢旱黃河淤淺諸水源涸居民惶亂邊
臣以聞真宗詔榷場勿禁西人市糧以賑其乏

秋七月太白犯輿鬼

入積尸

八月自將侵甘州不克

甘州兵乘勝追逐德明不能拒越黃河走免可汗
夜落紇上言乞朝廷署孔目官一員至本道以撫

納羌衆真宗慰諭之

九月靈夏飢表求粟百萬未得而罷

西北少五穀軍興糧饋多用大麥葷豆青麻子之

類其民春食豉子蔓鹹蓬子夏食菘蓉苗小蕪荳

秋食席雞子地黃葉登廂草冬則畜沙葱野韭柅

霜灰蓀子白蒿鹹松子以爲歲計時綏銀久旱靈

夏禾麥不登民大飢德明遣使奉表求粟百萬斛

廷議不知所出或言德明方納款而敢渝誓請降

詔責之宰相王旦曰第語德明爾土實饑朝廷撫

馭荒遠固當賑救然極塞芻粟屯戍多不可輟易

已敕三司具粟百萬于京師可遣衆來取德明得

詔慚且拜曰朝廷有人臣不合如此遂止續綱目列此事

于三年冬十二月考李氏長編云此事不審何時然據羣臣言德明方納款則亦可隱度故因夏州

旱連敘之

按救患分災禮也春秋之世歲飢告糴何國蔑

有求粟百萬則異矣未得而罷則尤異矣

冬十月遣使入獻賜兼中書令

德明聞中國封泰山遣使入獻真宗令西京左藏

庫使閻承翰爲加恩官告使賜德明兼中書令益
食邑一千戶實封四百戶承翰因德明于綏夏各
建館舍恭伺王人使還亦請于浦洛河置館以待
夏使詔以荒隻勞役不許

大中祥符二年

契丹統和二十七年

春三月德明移牒鄜延請

罷慶州濬濠

德明遣人輒由間道賫違禁物竊市于邊環慶都
鈐轄曹瑋發兵濬慶州濠塹遏之德明牒鄜延鈐
轄李繼昌言其事中朝方務招納遂罷之

夏四月遣兵攻甘州敗還

夏俗以不報仇爲恥德明與回鶻世仇憤其兵數
敗遣張浦將精騎二萬攻甘州可汗夜落紇拒守
經旬伺間遣將翟苻守榮夜出兵襲之浦大敗還
夜落紇令左温宰相何居錄越自秦州獻捷表陳
兵敗德明其立功首領請加恩賞真宗詔給司戈
司階郎將告敕十道使得承制補署

六月諜者盧蒐入環慶被獲

邏卒捕得之法當死真宗詔械送夏州令德明白

處之

冬十一月使請市弩

德明進奉使白守貴請市弓弩朝議以舊制弓矢

兵器不入外夷不許

十二月復出兵侵甘州恒星晝見懼而還

德明精天文通兵法夏俗出兵先卜其法有四一

炙勃以焦艾灼羊髀骨一擗算擗竹于地以求數

若揲著然一咒羊夜以羊焚香祝羊又焚穀火布

靜處晨屠羊視其腸胃通則兵無阻心有血則不

利沈括筆談西戎用羊卜謂之跋焦卜師謂之厮

乩以艾灼羊髀骨視其兆謂之炙跋焦其法兆

之上為神明近脊處謂之坐位坐位者主位也近

旁處為客位蓋西戎之屬所居正寢常留中一間

以奉鬼神不敢居之謂之神明主人乃坐其旁以

此占主客勝負又有先咒粟以食羊羊食其粟則

自搖其首乃殺羊視其五臟土人九神

之謂之死跋焦與宋史夏國傳稍異 四聽弓以

矢擊弓弦審其聲知敵至之期與兵交之勝負及

六畜之災祥五穀之凶稔是時德明自出兵攻回

鶻恒星晝見經天卜之不吉大懼還

按

德明甘州之役四書矣茲書復甚之也然能

因星變而懼則猶有畏天意焉

契丹使來告哀

承天皇太后喪也

大中祥符三年

契丹統和二十八年

春三月德明母野利氏卒

野利氏德明生母既卒郵延路以聞宰臣曰德明

頃年以告母喪朝廷錫以命典蕃戎之俗諸母衆

多必俟其有請別加商議既而德明不告哀中國

亦置之

按

書卒不書告哀著夷俗也夷俗諸母衆多使

不勝告然以生母并畧之亦成其爲夷而已矣

夏六月攻河州諸羌破之出大理河築蒼耳平柵

德明境內荒歉與鄰近族帳爭博糶量斛以平物
價又點集所部廣作礮樓西攻河州宗哥諸族破
之盡掠其貨財出大理河至蒼耳平築柵戍兵與
永平界蕃族日相劫殺

遂寇延州

德明遣鄜延都鈐轄張崇貴書稱遣牙校貢馬并

言延州熟戶明愛侵其綏州地崇貴疑其詐潛遣
兵戍境上德明果以兵三千入寇兵未發先遣所

部緣邊貿易潛覘虛實俄而衆突至戍兵出不意
逆擊大敗還

按

此德明擾邊之始前書侵麟府伐其謀也茲
書寇延州實其事也

秋七月蕃族萬子太保掠西蕃貢使于天都山

吐蕃部署綽克宗向屬西涼府咸平中爲趙保吉
所破徙居龕谷至是聞夏州歸順以馬三百匹入
貢過天都山德明屬下萬子太保見而奪之得至

京師僅二十餘匹

此事實錄正史皆不
載今據會要錄之

按上書德明茲書蕃屬上尤下效勢固然也

九月契丹封德明夏國王遂建宮闕于鏃子山

契丹主隆緒以德明朝貢時至遣使持冊封為夏

國王宋史夏國傳大中祥符元年契丹遣使冊德明為大夏國王考遼史聖宗紀大夏國王至

太平元年始德明益自大役民夫數萬于鏃子山封宋史誤

大起宮室縣亘二十餘里頗極壯麗山在陝西延

州境西北德明駐軍于此蓋欲窺中國也

按春秋遂者繼事之辭德明因朝廷姑息桀驁

漸形然未敢顯逞也迨契丹予以國號加以王

封遂敢建宮闕窺邊境大起僭端德明之跋扈
固可誅而契丹教猱之罪其又奚辭比書以交
惡之

冬十二月奉表自陳

德明表訴明愛侵耕綏州界乞遣使按視真宗詔
張崇貴詳度令明愛等還居內地然實未侵其界

也仁宗詔令在四年正月茲連敘之

大中祥符四年契丹統和二十九年春二月德明遣使入貢

德明貢使所過州軍官吏犒設頗簡真宗以遠人

慕義接不以禮恐生慢心特詔戒之

夏四月賀正汾陰進中書令

德明聞中國祀汾陰貢馬稱賀禮畢賜德明衣帶

鞍馬器幣賓佐將士銀帛茶菴時貢馬子弟或與

京城民爭毆折其齒開封府言當杖脊真宗詔付

鄜延路令移文德明就彼裁處尋遣勾當皇城使

韓守殷作坊使張佶爲官告使進德明中書令

秋八月掠回鶻貢奉使西蕃宗哥族發兵援之

甘州數與夏州戰夜落紇所遣貢使過境德明遣

人抄奪吐蕃宗哥族感中國恩化發兵護送方得
至京師

九月攻涼州樣丹族不克

樣丹西涼大族自作文法素不屬夏州德明遣軍
校蘇守信領蕃騎襲擊六谷大首領廝鐸督會諸
族禦之大敗守信兵守信西涼人也

大中祥符五年

契丹開
泰元年

春正月德明入貢

夏州貢使在道市物頗擾民真宗詔所在有司嚴
示約束

三月誘延州蕃落不得遂以侵黑林平地入奏

鄜延鈐轄張崇貴卒德明益踰軼常令所部釀酒
招內屬蕃戶飲之誘其叛附飲者多不如約延州
黑林平地向與夏境鄰德明誣爲熟戶侵佔眞宗
令陝西轉運使薛奎按驗奎閱郡籍得德明嘗假
道黑林平文移錄示之德明乃伏

獻馬契丹

契丹畜牧之法西夏與室韋例進馬三百匹是時
德明以良馬二百匹凡馬百匹獻契丹主優賜之

夏四月表乞綏州土田人戶

德明上表請以綏州土田人戶割隸本道邊臣爭之不許德明復使詣闕上訴真宗詔陝西轉運使取德明元進誓書與邊臣詳定報之

冬十一月中國禁使臣造軍器

德明供奉使至京輒仿中國制潛造軍器攜歸真宗下詔禁之

十二月加太保

聖祖降于延恩殿覃恩

大中祥符六年

契丹開泰二年

春二月德明如斡子山

德明雖臣宋與契丹而僭擬日甚是時由夏州如

斡子山大輦方輿鹵簿儀衛一如中國帝制

按

此德明僭帝制之始

夏五月党項曷党等部來投不納

東山党項諸部皆順契丹因困徵發悉遁黃河北

依模赧山以居惟曷党烏迷兩部尙居故地遣使

約歸夏州德明不敢納

秋七月以兵從契丹攻党項

契丹主聞曷党等西歸遣使撫諭不聽賜詔德明曰党項叛我今欲西伐爾當東擊毋失犄角之勢德明出兵境上應之

八月契丹使賜車馬

契丹主以夏兵助討党項遣引進使李延宏賜德明及義成公主車馬

九月旺家族首領都子走還環州

隨之走者又三族

大中祥符七年

契丹開泰三年

春二月德明遣使入朝加宣

西夏書事 卷九
三
德功臣號

宣德賜皇子皇親號也德明聞車駕謁太清宮遣使詣行闕朝賀獻方物特加賜號寵異之

秋七月張浦卒

浦銀州人事保吉德明兩世忠誠練達知無不言及卒德明臨其喪哭之慟贈銀州觀察使元昊僭號追封銀川伯

按書夏臣卒始此

冬十一月遣使入貢

德明進奉使每挾帶私物規免市征郵延路鈐轄
張繼能奏請條約真宗以戎人遠來獲利無幾命
第如舊制

宣德元年... 秋七月... 宣德元年... 秋七月... 宣德元年... 秋七月...

秋七月張輔卒

清獻州人... 及卒德明... 兼收舊... 清獻州人... 及卒德明... 兼收舊...

詔... 詔... 詔... 詔... 詔...

西夏書事卷九終

對帶... 對帶... 對帶... 對帶...

西夏書事卷十

青浦 吳廣成西齋 纂

大中祥符八年

契丹開泰四年

春三月德明表請市鹽復責

入質不遣

德明以西鹽不通蕃部困敝遣牙內指揮白守貴詣京師陳請朝議德明必欲通鹽禁惟子弟入質方許蓋以必不肯從之事絕之也德明果不肯遣于是禁鹽如初

夏四月蕃部浪密囊等叛投環州

德明蕃部指揮浪密囊麻孟桑二人投環州眞宗以前有熟戶逃亡曾爲西界所納可移牒追取俟其遣還乃以浪密囊等付之

五月遣使入獻

夏國進奉使入邊輒驚其所乘馬邊人以價值賤爭市之于是使者帶馬日多疆吏以聞眞宗詔嚴其禁

秋八月西蕃唃廝囉攻夏州拒卻之

唃廝囉吐蕃贊普裔初居宗哥城與論逋李立遵

不協徙居邈川有勝兵六七萬自西涼破潘羅支
舊部聳昌廝均等悉歸唃廝囉回鶻降者復數萬
由是富強時以兵攻夏州德明禦卻之唃廝囉希
朝廷賜予請聚舉國之衆助討夏州眞宗以其累
次侵邊或有變詐命周文質監涇原軍曹瑋知秦
州備之

冬十一月築堡麟州建榷場

初延慶二州熟戶其親族在西界輒私致音問潛
相貿易夏人因以爲利中國察其奸不許德明乃

于麟州之濁輪谷築堡建榷場以誘致商旅真宗
詔緣邊安撫使禁止之

大中祥符九年

契丹開泰五年

夏五月德明使蕃騎寇慶州

德明數請市鹽私置榷場不得在國點閱兵馬陰

謀侵掠兀泥族大首領名厓其從父盛佶先為保

吉所虜授白池軍主密遣使告名厓名厓以聞真

宗命邊臣謹備之至是有夏州蕃騎千五百入寇

慶州為內屬蕃部邀擊敗還

按

宋史真宗紀五月夏州蕃騎千五百入寇慶

州不言德明使茲特書之蓋德明以市鹽建場
不遂其欲糾集兵騎陰謀內擾慶州之寇不謂
德明使不得也

追上保吉尊號

德明既僭帝制令官屬建議祀典劉仁勗曰先王
創造大業中道崩殂今徽號未加非報本追崇之
意德明用其言上保吉尊號曰應運法天神智仁
孝至道廣德光孝皇帝廟號武宗群臣上表賀

按史言德明稱帝國中然猶外順宋命未有明

據觀于追上父號僭越顯然矣

秋七月夏州甘露降

德明大赦國中

按

德明嗣位十餘年一書夏州旱再書恆星晝

見皆災異也因其時圖伐甘州戾氣致變天道

人事原相應耳茲書甘露降豈夏州朔漠有善

政足以致之抑中朝之受天書迎聖祖草木雲

霧無不稱祥上有好而下有甚者乎然德明自

是而後併甘涼降瓜州兵威日熾是適以滋其

悍也

冬十月遣使入貢請詔約邊臣

德明數苦邊境鄜延鈐轄張繼能削竹爲簽署其上云以備記將士殺獲功狀德明聞之懼遣大校劉仁勗貢馬二十四上言蕃漢部落戎寇襍居劫掠是常逋亡不一臣自景德中來進誓表朝廷亦降詔書應兩地逃民緣邊襍戶不令停舍皆俾交還從茲謹守翰垣頗成倫理自向敏中歸闕張崇貴云亡後來邊臣罕守舊制各務邀功不虞生事

遂致延綏涇原等界擅舉甲兵入臣境土其有叛
亡部族刦掠主財去者百無一回臣之邊吏亦務
蔽藏俱失奏論漸乖盟約臣今欲將所部應有南
界背來蕃族人戶乞朝廷差到使臣就界上交付
所有臣本道自進納誓表後走投南界蕃戶亦望
下詔逐處發遣歸回未賜俞允卽望敦諭邊臣悉
遵詔約肅清往來之奸寇止絕南北之逋逃俾臣
得內守國藩外清戎落豈敢違盟負約有始無終
虛享爵封取誚天下但恐朝廷不委茲事詔未察

本心須至剖陳上千天聽真宗答詔曰卿世濟勲庸任隆屏翰翊忠規而奉上正師律以守藩布露懇誠條陳章疏載加閱覽備悉傾輸且國家奄宅中區統臨四海咸推覆育豈限邇遐凡命將帥之臣惟存備禦之戒所有文字往來辭說異同部族賤貧輾轉仇報掠過生口彼此交還其如不見端倪互相誣執或因緣懷竊增飾邀求朝廷固不細知邊壘亦爲常事及詳來奏深究弊源難悉難窮當申約束已令鄜延涇原環慶麟府等路部署鈐

轄司今後約勒蕃部不得輒相刦奪擅興甲兵凡
稍涉交爭須盡公措理其有廣佔阡陌隱庇逃亡
畫時勘窮押送所管卿本道亦宜嚴戒部下不得
更有藏匿各遵紀律共守封疆嘉歎之懷不忘寤

寐

涼州守將蘇守信死十一月甘州回鶻攻破之

德明使守信守涼州有兵七千餘馬五千匹諸蕃
畏其強不敢動回鶻貢路悉爲阻絕守信死其子
囉麻自領府事部衆不服甘州可汗夜落隔遣兵

攻破之擄其族帳百餘斬級三百奪馬匹甚衆囉
麻棄城走于是涼州屬于回鶻

天禧元年

契丹開泰六年

春二月德明加太傅

德明聞中國有大典禮必遣使入賀是時眞宗改
元詣玉清昭應宮上玉皇天尊寶冊袞冕謝天
地于南郊大赦中外官並加恩會夏州使至詔加
德明守太傅食邑千戶實封四百戶

夏六月有龍見于溫泉山

山在懷遠鎮北德明以爲瑞遣官祀之于是有遷

都之意

秋八月囉麻請取涼州不克

囉麻走入沙漠潛遣人至涼州約舊時蕃卒內應

請德明出兵赴援回鶻結六谷諸部拒之卒不能

克

天禧二年

契丹開泰七年

春三月德明掠甘州貢奉使

德明攻西涼不得志輒與甘州搆難偵知其貢使

安信等入京遣蕃部從間道掠之會正使先發僅

得餘騎而還

秋七月吐蕃遣使假道不許

吐蕃別種可汗并里尊以朝貢契丹道紆不能猝
達契丹主諭以假道夏州并里尊遣使來請德明
不許

天禧三年

契丹開泰八年

春二月德明繼立母卒

德明遣使告哀眞宗以屯田員外郎上官秘充弔
贈兼起復官告使閣門祇候常希古爲致祭使

按書卒不書氏史闕也

三月攻慶州敗官軍于柔遠砦

德明部落委乞骨咩大門諸族由柔遠砦寇慶州

巡檢楊承吉與戰不利真宗曰德明向順朝命邇

何頻次侵擾豈邊將失于撫綏耶命曹瑋為副都

總管環慶秦州緣邊巡檢使備禦之瑋至慶州骨

咩大門等族爭內降宋史夏國傳載德明攻柔遠在真宗乾興元年之明年乃

仁宗天聖元年也而李氏長編在天禧三年三月

真宗紀骨咩大門等族歸附在天禧三年九月茲

并敘之

冬十一月加崇仁功臣號

崇仁賜親王重臣者時真宗郊祀受尊號故覃恩

天禧四年契丹開泰九年春正月德明屬羌寇延州

德明數受中國恩禮志氣驕盈不復謹約蕃部宥州羌臘兒率衆劫延州熟戶門嵬族金明監押李士彬率兵擊之斬臘兒奪馬三百匹真宗詔鄜延部署司以其事報德明

夏四月兩月並出

見西南方

五月契丹兵攻涼州擊走之

并里尊以假道不許不復朝契丹契丹主歸罪德

明親將兵五十萬佯言出獵直攻涼州德明率衆
逆拒敗之

附

李氏長編天禧四年六月辛丑鄜延鈐轄周
文質言趙德明繼遣人騎寇掠熟戶望多發兵
馬于慶州界破蕩族帳以遏侵擾按德明繼遣
屬在何時宋史無考

冬十一月城懷遠鎮爲興州定都之

靈州懷遠縣始于後周宋初廢爲鎮保吉取靈州
時盡逐居民城外遂皆徙依懷遠德明以龍見之

祥思都其地謀之于衆僉曰西平土俗淳厚然地

居四塞我可以往彼可以來不若懷遠西北有賀

蘭之固黃河繞其東南西平爲其障蔽形勢利便

洵萬世之業也况屢現休徵神人允協急宜卜築

新都以承天命德明善之遣賀承珍督役夫北渡

河城之構門闕宮殿及宗社籍田號爲興州遂定

都焉

宋史夏國傳德明城興州在乾興二年而李氏長編在天禧四年末其考異云德明正傳

載城興州在李士彬斬羌酋臘兒後不得其時考士彬斬臘兒在本年正月故附年末今從之

史臣曰河自南來入青銅峽與西夏羣山相會出

峽口北流三百餘里直接賀蘭興靈包絡其中可謂四塞險固矣西夏據此二百餘年後以韓范經營亦不能恢復雖元昊諒祚輩梟雄難制亦其恃者險也

按此西夏定都之始

天禧五年契丹太平元年夏五月德明終喪入內都知藍繼

宗來賜起復

德明與繼宗較射繼宗每發必中德明驚服遺以

所乘名馬

按凡賜起復無故可不書此書美繼宗也德明
自張崇貴卒輕視中國日肆鴟張今繼宗較射
多中使知中朝材武卽宦寺中且不乏人也

秋七月契丹暨夏平封德明大夏國王

德明旣卻契丹兵謹封堠巖點集爲備契丹主見
進奉使不至恐爲邊患諭意講和德明亦請臣貢
如初契丹主遣金吾衛上將軍蕭孝誠賫冊授德
明爲尙書令晉大夏國王

按西夏自繼遷跳梁德明款附雖有逆順之分

然其心總易視中國畏視契丹非惟資其援助
抑亦憚其兵威也契丹知其然一切不稍假借
故其勢常尊今一戰不勝而願與之平且稱爲
大夏是其不競直與宋同春秋例和而不盟曰
平暨者不得已也書以譏之

冬十一月使如契丹謝

德明謝契丹封冊獻良馬二十四匹凡馬百匹

乾興元年

契丹太平二年

春正月德明加純誠功臣號

德明自歸順以來每歲旦聖節冬至皆遣牙校進

獻朝廷恩錫官告每以襲衣五金荔支帶金花銀匣副之又銀沙鑼盆合千兩錦綵千匹金塗銀鞍勒馬一匹副以纓遣內臣就賜之

夏五月表請大食國貢使取道夏州

大食波斯別種其入貢路由沙州涉夏境抵秦州德明思掠其進奉物上表請敕使者道其國中時仁宗新立知其詐不許詔大食自今入貢取海路由廣州入京師

秋七月納洪德砦蕃官慶香降

環州洪德砦蕃族巡檢慶香與屬戶者龍等十八人詣供奉官胡寧給稱夏兵入邊諸族危迫寧信之率衆赴援至歸德川伏發戰死慶香率本族三百餘帳亡入夏界德明納之環州部署招之還者幾二百香等百餘戶不出

八月西蕃宗哥族侵夏州

天禧初宗哥族酋長馬波叱臘等與伏羌砦蕃部厮雞波連結爲亂知秦州曹瑋率神武軍破之野吳谷餘衆遁走沙漠至是舉衆侵夏州德明治兵

相攻殺西州貢路不通

九月契丹使賀生辰

德明生辰契丹主使堂後官張克恭來賀

宋仁宗天聖元年

契丹太平三年

春正月德明加尙書令

仁宗卽位改元故

二月萬子軍主蘇渴鬼內附

中國授三班奉職賜名李文順居之陳州

秋八月掠平涼

戎人飄忽多詐出沒不時德明部落屢肆侵掠朝

西夏書事 卷十
廷莫之間時有衆萬人入渭州直犯平涼方渠等
州守將與軍候周美追擊破之戎人從九井原烏
崙河遁

冬十月閣門祗候康德輿來賜冬服

德輿父贊元雍熙中爲作坊使嘗從曹光實襲地
斤澤夏人謂德輿曰前戰靈武康將軍非先世耶
德輿懼復仇給曰非也

按上犯平涼此賜時服賞之愈濫感之愈微德

明之肆宋實啟之

天聖二年

契丹太平四年

春二月德明作省嵬城于定州

定州省嵬山在懷遠西北百餘里土地膏腴向為

蕃族樵牧地德明于山之西南麓築城以馭諸蕃

夏四月綏州蕃寇保安軍

蕃族軍主罔列等擊敗之廊延路以聞仁宗令以

其事報德明

六月遣使入謝

德明使至中國私市禁物隱關稅為奸利戶部郎

中薛奎知延州請留蜀道縑帛于關中轉致給之

夏主趙振引諸將援之抵平遠力戰七日破其圍斬首數千級羌勢大衰使人渡河求助德明守境不應羌衆不支請降

天德

按

德明洵有功于宋矣是時羌衆雖敗猶冀夏

州之援以圖再舉自德明拒之始望絕而降矣

書以予之

文志自景平十二月至六年

秋七月中國遣使來諭

羌人之亂仁宗以德明爲疑遣使詔諭德明據實

以聞

冬十一月貢于契丹

契丹主以德明勢日強盛厚賜使者遣還

十二月月犯東井

按

宋史天文志自是年十二月至六年七月共

月犯東井七

天聖四年

契丹太平六年

春二月德明請與并代二州和市

時陝西已有榷場二德明復請于并代路置場和

市仁宗許之

夏六月遣兵助契丹攻甘州

設伏殲于日慈其國

甘州回鶻阿薩蘭部叛契丹契丹主遣魏國公蕭惠徵諸路兵討之德明點集蕃衆遣之西出蕭惠攻甘州三日不克部下阻卜諸酋復叛急引歸德明兵亦還

秋八月熒惑入東井

十餘日始去

附

遼史聖宗紀太平六年冬十月遣使問夏國五月與宋交戰之事考宋史仁宗紀是年五月無夏人構兵事

天聖五年契丹太平七年春二月德明入貢

德明遣都知兵馬使白文美入貢方物且告其東南蕃部多有叛入漢界者乞賜還仁宗詔鄜延部署司據數遣之

夏四月歸中國逃戶

初中國沿邊軍民之逃者必為熟戶畜牧或以遺遠羌易羊馬故常沒者數百人間有自歸者中道輒為夏人所得是時仁宗聞落蕃戶口日多命夏州護送境上德明遵詔還之

附

五朝史五月壬寅以延州金明縣都監李士彬爲供備庫副使初西人寇金明士彬與弟士均率兵擊敗之斬首千餘級據長編考異云西人或是趙德明或是屬羌未攷

秋九月有星沒東井

出于北河沒于東井

按德明自仁宗登極西州尙屬相安而恒星列

曜垂異分野史不勝書蓋是時元昊年長雄圖漸啟戎馬生郊戰爭方始天文預兆未始無因

也

大聖... 德... 南... 推于... 東共

木... 東共

人... 未... 收...

自... 繪... 吳云西

沐... 西人... 與... 士

西夏書事卷十終

壬寅... 金... 李士